

國

朝

列

卿

紀

國朝列卿紀卷之一百五

總督軍務巡撫浙江序

浙江古揚州地漢會稽郡兼統二浙隸揚州部刺史唐貞觀中隸江南道開元中增置江南東道採訪處置使而兩浙諸州並隸焉宋初以兩浙爲一路後分浙東西爲兩路而浙西安撫使治臨安浙東安撫使治紹興並以守臣兼領元置江浙等處行中書省及江南浙西道肅政廉訪司於杭州又置浙東海右道肅政廉訪司於婺州又置浙東道宣慰司於慶元 本朝置浙江等處承宣布政使司領杭州嘉興湖州嚴州金華衢州處州紹興寧波台州溫州十一府置浙江都指揮使司領杭州前杭

州右紹興寧波台州處州溫州海寧昌國松門臨山金鄉海門
 定海磐石觀海十六衛湖州嚴州金華衢州海寧五所置浙江
 等處提刑按察司分浙東浙西二道兼察諸府衛所自永樂以
 來或以治農或以採木或以賑饑或以督租或以整理鹽法或
 以地方有事巡視鎮守俱奉 勅以往事寧則罷並未專設巡
 撫至嘉靖二十六年沿海寇發始命都御史朱統巡視浙江福
 建二十八年停革三十三年又因倭夷蟄起入犯杭城所在焚
 掠特命尚書張經提督浙江福建南直隸軍務又專設都御史
 巡撫三十六年命巡撫浙江都御史仍提督福直軍務四十二
 年定議總督軍務巡撫浙江等處地方官銜遵守至今然兩浙

當天下財賦之半東則寧紹台溫西則杭嘉湖諸郡俱瀕海倭
夷出沒爲患處州依山盜礦與嚴衢之寇燕跡嘯聚皆是腹心
之疾而地饒多利俗尚華靡孰非誨盜之漸耶是在謀國者加
意撫綏可不勞而治矣今詳各官宦履於後其行實見於事紀
其勲德茂著者表爲列傳故 勅使撫臣並列

國朝列卿紀卷之一百五

勅使并巡撫浙江尚書侍郎都御史卿年表

夏原吉

湖廣湘陰人鄉舉永樂元年以戶部尚書治兩浙農事

劉觀

直隸雄縣人進士永樂四年以右副都御史採木浙江詳都察院

俞士吉

浙江象山人鄉舉永樂四年以右僉都御史賑兩浙饑荒五年回京詳南京刑部侍郎

虞謙

直隸金壇人監生永樂十九年以左副都御史巡撫浙江事竣還院

胡槩

江西吉水人進士洪熙元年以大理寺卿撫視兩浙及蘇松常鎮四年還朝詳都察院右都

王讓

山東益都人鄉薦宣德三年以行在吏部右侍郎出督浙租四年卒於官詳吏部侍郎

趙倫

陝西邠州人歲貢宣德四年以戶部右侍郎巡視浙江五年以事調河南布政詳南京戶部侍郎

羅汝敬

江西吉水人進士宣德四年以工部右侍郎督兩浙漕運

成

均

直隸鹽城人歲貢宣德五年以刑部右侍郎巡撫詳南京戶部侍郎

王

翱

直隸鹽山人進士正統二年以右僉都御史巡視兩浙整理鹽法事竣回院詳吏部尚書

王

淪

河南太康人進士正統五年以戶部右侍郎出督浙運六年劾免詳南京戶部侍郎

焦

宏

河南葉縣人進士正統六年以戶部右侍郎鎮守浙閩蘇松十年還部詳戶部侍郎

張

驥

陝西安化人永樂戊子鄉薦正統十年以大理寺少卿巡撫卒於官

張

楷

浙江慈谿人進士正統十二年以征闕右僉都征浙東葉宗留詳南院僉都

石

璞

河南臨漳人舉人正統十三年以工部尚書提督軍務征處州賊葉宗留詳兵部尚書

陳

詔

浙江青田人進士正統十三年以僉都御史安撫本郡山民詳都察院僉都

軒

輓

河南鹿邑人進士正統十三年以都御史巡撫詳刑部尚書

孫

原貞

江西德興人永樂乙未進士正統十三年以兵部右侍郎平浙閩盜景泰二年進兵部尚書鎮守浙江福建景泰三

年卒
於官

洪英 福建懷安人永樂乙未進士景泰三年以右都御史考察浙江官吏四年被誣訐致仕

劉廣衡 江西萬安人進士景泰六年以右副都御史討浙閩寇詳刑部尚書

曾暈 江西泰和人進士成化六年以刑部左侍郎巡視浙江詳刑部侍郎

劉敷 江西永新人進士成化八年以右副都御史巡撫莆田人進士弘治元年以刑部右侍郎

彭韶 福建莆田人進士弘治元年以刑部右侍郎巡視尋兼左僉都整理鹽法詳刑部尚書

王璟 山東沂州人進士弘治十六年以右僉都御史巡視兩浙詳都察院左都

張憲 江西德興人進士弘治十八年以工部侍郎兼僉都御史清理浙閩鹽法正德元年加右都仍董其事三年回院詳

南京工部尚書

陶琰 山西絳州人進士正德七年以右都御史巡視兩浙詳南京兵部尚書

陳天祥

直隸吳縣人弘治丙辰進士正德十一年以右副都御史兼理浙閩鹽法本年卒於官詳都察院副都

趙鑑

山東壽光人進士正德十一年以右副都御史清理浙閩鹽法詳刑部尚書

許庭光

河南湯陰人進士正德十四年以右僉都御史巡視浙江兼管南直徽州一帶詳四川巡撫

王堯封

直隸定興人進士嘉靖八年以右副都御史巡視兼制福建沿海本年開任詳南京兵部尚書

胡璉

直隸沐陽人進士嘉靖八年以右副都御史巡視浙福沿海十年改巡江西

朱統

直隸長洲人正德辛巳進士嘉靖二十六年以右副都御史巡視浙閩二十八年開任

王忬

直隸太倉人嘉靖辛丑進士三十三年以右副都御史巡視浙江福建詳勘遼總督右都御史

張經

福建侯官人正德丁丑進士嘉靖三十三年以兵部尚書提督浙福南直軍務三十四年下獄典刑

李天寵

河南孟津人嘉靖戊戌進士三十三年以右僉都御史巡撫三十四年下獄典刑

楊宜

直隸衡水人嘉靖癸未進士三十三年以兵部右侍郎兼右僉都提督浙直軍務三十四年致仕

阮鶚

直隸桐城人嘉靖甲辰進士三十四年以右僉都御史巡撫詳福建巡撫

胡宗憲

直隸徽州府績溪縣人嘉靖戊戌進士三十四年提督浙西軍務三十六年加右都御史兼兵部右侍郎巡撫浙江

仍提督福直軍務三十九年加太子太保兵部尚書四十年加少保四十二年開往下獄

趙炳然

四川劍州人嘉靖乙未進士四十二年以右都御史巡撫四十二年進兵部尚書

劉畿

直隸長洲人嘉靖庚戌進士四十三年以右都御史巡撫陞南京兵部右侍郎告病

張師載

湖廣潛江人嘉靖丁未進士隆慶元年以右副都御史推未任養病起撫陝西

趙孔昭

直隸邢臺人嘉靖甲辰進士隆慶元年以右僉都御史任陞戶部右侍郎

郝應龍

陝西長安人嘉靖丙辰進士隆慶二年以左副都御史總理浙江屯鹽九月聽候用

谷中虛

山東海豐人隆慶二年以右僉都御史任陞兵部右侍郎

熊汝達

江西進賢人嘉靖甲辰進士隆慶四年以右副都御史任陞南刑部侍郎

郭朝賓

山東汶上人嘉靖乙未進士隆慶五年以右副都御史陞戶部左侍郎

鄔璉

江西新昌人嘉靖甲辰進士隆慶五年以右副都御史任

張鹵

河南儀封人嘉靖己未進士隆慶五年以右僉都巡撫十二月丁憂

方弘靜

直隸欽縣人嘉靖庚戌進士萬曆元年以右副都御史任

謝鵬舉

湖廣蒲圻人嘉靖癸丑進士萬曆三年以右副都御史任

徐拭

直隸常熟人嘉靖丁未進士萬曆四年以兵部右侍郎兼右僉都御史任

李世達

陝西涇陽人嘉靖丙辰進士萬曆六年由河道右副都御史改巡撫十二月養病

吳善言

直隸成安人嘉靖壬戌進士萬曆七年由朔州道叅政陞右僉都御史巡撫十年三月聽勘致仕

張佳胤

四川銅梁人嘉靖庚戌進士萬曆十年以兵部右侍郎兼右僉都御史任

蕭廩

江西萬安人嘉靖乙丑進士萬曆十一年由陝西僉都陞右副都御史任十二年六月陞南京工部侍郎

溫

純

陝西三原人嘉靖乙丑進士萬曆十二年以兵部右侍郎兼右僉都御史任

滕伯輪

福建甌寧人嘉靖壬戌進士萬曆十五年二月由操江陞右副都巡撫十七年六月卒

傅孟春

江西高安人嘉靖乙丑進士萬曆十七年由操江起左僉都任

勅使并巡撫浙江行實

夏原吉字維喆湖廣湘陰人洪武庚午舉人永樂元年兩浙大水以戶部尚書往治兼督農事奏罷妨民蠹政數十事訪水之源委躬督濬治水不爲患又奏發粟三十萬石以賑饑給貧民牛種吳人懷之三年召掌戶部事詳戶部

劉觀字

直隸雄縣人洪武乙丑進士永樂四年以右副都

御史採木浙江詳都察院

俞士吉字用貞浙江象山縣人洪武丙子鄉薦永樂三年浙西大水以右僉都御史同尚書夏原吉往治兼督農務時湖州災甚虧糶五六十萬同事以所虧反十倍於所輸欲損數以報士

吉力爭曰欺君病民吾不忍爲竟以實聞 上悉蠲之四年坐
事謫爲辦事官尋復職命賑恤兩浙饑荒五年回京詳南京刑
部侍郎

虞謙字伯益直隸金壇縣人洪武中國子生永樂十九年以左
副都御史巡撫浙江察廉糾貪建議便民十數事多見施行事
竣還院詳大理寺

胡槩字元節江西吉水人永樂辛卯進士洪熙元年以大理卿
撫視兩浙及蘇松常鎮偕中貴往凡官吏之無狀民之尤無良
爲巨蠹者籍其家械京寘諸法於是奸宄帖息民安其業老穉
頌之四年還朝詳都察院右都

王讓字宗禮山東益都縣人洪武末由鄉薦授國子學錄歷左春坊左庶子宣德三年以吏部右侍郎督理浙江負欠積多秋租四年卒於官詳吏部侍郎

趙倫字

陝西邠州人洪武中歲貢入太學擢兵部職方郎

中宣德四年以南京戶部右侍郎巡視浙江五年調山西左叅政詳南京戶部侍郎

羅汝敬名簡江西吉水縣人永樂甲申進士宣德四年以工部右侍郎督兩浙漕運奏減荒田稅糧民賴之詳工部侍郎

成均字

直隸淮安府鹽城縣人永樂六年歲貢入太學歷

江西按察司副使宣德三年陞南京刑部右侍郎五年巡撫浙

江築捍海隄民賴之七年改南京戶部

王翱字九臯直隸鹽山縣人永樂乙未進士正統三年以鎮守江西右僉都御史奉勅巡鹽浙江整理鹽法祛除土豪本年還詳吏部尚書

王淪字（字）河南太康縣人永樂丙戌進士歷叅議正統五年以南戶右侍郎出督浙運六年劾免詳南京戶部

焦宏字克明河南葉縣人永樂辛丑進士正統六年海寇往來海中伺使抄掠以戶部右侍郎鎮守閩浙蘇松閱諸軍修城堞備戰艦防守之法有當因革損益者悉以便宜行事政令一新寇不得爲害嘉定民田已歸官而稅尚在民乃蠲其稅十年還

部詳戶部侍郎

張驥字
陝西慶陽府安化縣人永樂戊子領鄉薦宣德中
拜監察御史十年陞大理寺少卿正統五年山東饑荒特命巡
撫多所全活十年改撫浙江卒於官

張楷字式之浙江慈谿縣人永樂甲辰進士正統十三年以右
僉都御史監征閩軍奉勅旋師同總兵徐恭征葉宗留恭次
金公山甚危楷援之至卽伏兵樹鳴兒芭爲壘賊至麾兵擊之
佯走賊追逼壘伏兵四起一鼓殲之景泰改元班師至京有妬
其功者劾之罷歸詳南京都察院僉都

石璞字仲玉河南臨漳縣人永樂庚子舉人正統十二年以丁

部尚書提督軍務帥師討葉宗留詳南京都察院左都

陳詔字廷詢浙江青田縣人宣德庚戌進士正統十二年處州盜起以詔爲鄉邦所信陞右僉都御史安撫特宴賚而遣之詔至諭以天子寬仁不忍誅殺之意衆咸服從召還勞以羊酒俾視院事詳都察院僉都

軒輓字惟行河南鹿邑縣人永樂甲辰進士任浙江按察使景泰元年以右副都御史鎮守浙江兼理鹽課四月輓奏福建賊吳金八等流劫青田攻圍平陽千戶所議遣布政孫原貞僉襄鄜彥譽會勦從之二年命總督南京糧儲詳刑部尚書

孫原貞字

江西饒州府德興縣人永樂乙未進士任禮部

郎中歷河南叅政正統三年五月貞奏故汜水典史曾梟有善
政民懷之乞追復原御史官從之十一年巡撫于謙舉原貞自
代中璫王振阻之尋陞浙江布政使景泰元年福建賊吳金八
等流劫青田攻圍平陽所鎮守軒輓奏遣原貞與僉事鄺彥譽
會勦之五月以功最陞兵部右侍郎叅贊浙江總兵李信軍務
二年七月處州盜平奏折麗水青田置雲和宣平景陵三縣十
月浙閩盜平進兵部尚書鎮守浙江福建請置福建永安壽寧
二縣三年致仕文章勲業取重當時歸老歲寒溪因以歲寒自
號成化十年卒年八十七國史稱其居官清慎自守多著勞效
令終壽考世所難得云

洪英字

福建福州府懷安縣人永樂乙未進士宣德元年

授吏部文選司主事正統五年陞考功司郎中十三年陞左副都御史巡撫山東景泰三年以治黃河功陞右都御史鎮守浙江五月命考察浙江官吏英素不與中官相識考察一秉公直被黜者妄訴之且加謗毀朝廷不及考而罷四年令致仕人皆惜之

劉廣衡字克平江西萬安縣人永樂甲申進士景泰四年以右副都御史討浙閩寇鄭懷胃王孝心等至則賊已就擒以山有銀場賊得以潛伏其中奏立縣治其患遂息詳刑部尚書

曾暈字時升江西泰和縣人宣德癸丑進士成化元年任河南

左布政使四年陞刑部左侍郎五年 命巡視浙江許便宜從
事至則徧歷郡縣問民疾苦考吏治得失奏罷布政張清等數
百人薦何宜李嗣阮勤劉喬等十餘人後皆爲名臣省重役減
官租謫奸吏禁刁訟局匠死絕者減其額銀礦絕者停其課革
冗濫增徼役民皆稱便踰年回部詳刑部侍郎

劉敷字叔榮江西永新縣人景泰辛未進士任福建左布政成
化八年以右副都御史巡撫海潮濠潞舉荒政宜於時者行之
昏墊之民數千家皆不至失所鎮守中官席勢牟利操切之使
不得逞奏革其受民詞訟送著爲令詳都察院右都

彭韶字鳳儀福建莆田縣人天順丁丑進士弘治初年以刑部

右侍郎巡視誅浙西不靖渠壩數人効能守臣一方晏然元年
戶部言兩浙鹽法久壞命以本官兼左僉都留治之以浙西通
舟利多於浙東而浙東亭戶御配尤甚因定其折價之輕重及
處州等課額宜殺凡便宜事奏行之又圖煮海之民貧苦狀以
進時僉事王輔憲使毛鷄不相能且關於堂乃奏其失體左遷
之三年陞吏部左侍郎詳刑部尚書

王璟字廷霖山東沂州人成化壬辰進士弘治十三年任南京
鴻臚卿十四年陞右僉都御史理兩淮鹽法十六年浙東饑命
賑濟上經畫要宜十事以杭嘉湖寧紹台災甚奏減其稅及省
杭湖軍糧三十餘萬停刷卷御史三年所活四十餘萬人十七

年改撫保定詳都察院左都

張憲字廷式江西德興縣人成化壬辰進士弘治十八年以工部右侍郎兼右僉都御史整理兩浙八閩鹽法親歷諸場災癘無所避適三品九年考滿陞右都御史仍督其事將就緒正德二年逆瑾專政議革巡撫召還詳南京工部尚書

陶琰字廷信山西絳州人成化辛丑進士正德七年以右都御史巡視兩浙寧紹瀕海屬邑颶風壞海堤三百里漂溺居民萬數琰聞之憂甚亟出帑銀多方賑救仍委官築堤自蕭山至餘姚凡五萬餘丈琰慮姚源賊難信奏設兵備及簡羣僚之有才者分守要害處置周悉明年春賊果突入境琰亟臨督戰賊潰

走進兵擊之餘黨悉平捷聞 賜璽書獎勵資金幣陞從一品俸又以開化常山遂安蘭谿係賊出沒真衝悉城之凡六月而訖工詳南京兵部尚書

陳天祥字元吉直隸吳江縣人弘治丙辰進士正德十一年以右副都御史清理浙閩鹽法至浙而病歸卒詳都察院副都

趙鑑字克正山東壽光縣人成化丁未進士歷陝西右布政使歷南院右副都御史正德十一年以右副都御史清理浙閩鹽法入視院事詳刑部尚書

許庭光字

河南河陰縣人弘治己未進士正德九年任江

西按察司副使十二年任應天府丞十四年陞巡視浙江右僉

都御史兼管南直隸徽州一帶詳四川巡撫

王堯封字

直隸定興縣人弘治乙丑進士嘉靖八年由巡

撫山東右副都御史改巡視浙江兼制福建沿海地方本年開
任十一年起撫陝西詳南京兵部尚書

胡璉字

直隸沐陽縣人弘治乙丑進士嘉靖八年以右副

都御史巡視浙江福建沿海地方十年改撫江西見戶部荅侍
郎總雲貴糧儲

朱統字子紀直隸蘇州府長洲縣人正德辛巳進士嘉靖二十

五年任右副都御史提督南贛汀漳軍務二十六年改巡視浙

江福建二十八年閑任

國朝列傳

之一百五終

國朝列卿紀卷之一百六

提督軍務巡撫福建序

夫福建古閩越地漢以揚州部刺史領之東漢於

部都尉唐初隸江南道復隸江南東道採訪處置使大曆中始
置福建觀察使治福州宋置福建路安撫使以福州守臣兼領
元置福建等處行中書省於泉州尋徙福州置福建道宣慰使
司都元帥府及福建閩海道肅政廉訪司於福州 本朝置福
建等處承宣布政使司領福州泉州興化建寧延平汀州邵武
漳州八府置福建都指揮使司領福州左福州右福州中福寧
鎮東泉州永寧興化平海漳州鎮海一十一衛又置福建行都

指揮使司領建寧左建寧右延平汀州邵武五衛及將樂守禦千戶所置福建等處提刑按察司分福寧建寧二道兼察諸府縣衛所自革除中命戶部侍郎夏原吉充採訪使巡視沿海地方事竣還部永樂二十二年又命侍郎楊勉巡視事畢亦還部正統六年以後因地方有事并山寇竊發或命鎮守或命督軍或命巡視無巡撫專官嘉靖二十六年海寇有警始命都御史朱統巡視浙江福建二十八年裁革三十三年因倭寇崛起浙江仍設都御史巡視閩浙提督軍務三十六年倭寇移犯閩地始專設都御史巡撫八閩遵守至今然福建僻在南服福興泉漳以海爲襟倭夷出沒其間延建邵汀以山爲枕山寇多負固

爲巢穴大抵因地狹民貧故獷悍之習窺伺爲奸其勢所必至
耳端本澄源補偏抹弊以潛折其奸萌是豈可緩乎哉今詳各
官宦履於後其行實見於事紀其勲德茂著者表爲列傳故
勅使撫臣並列云

國朝列卿紀卷之一百六

勅使福建并巡撫尚書侍郎都御史少卿年表

夏原吉

湖廣湘陰人鄉舉革除中以戶部侍郎充採訪使巡視福建地方本年事竣還部詳戶部尚書

楊勉

應天江寧人進士永樂十九年以刑部右侍郎巡視福建詳刑部侍郎

吾紳

浙江開化人進士宣德五年以南京刑部右侍郎考察福建藩臬郡縣官吏

焦宏

河南葉縣人進士正統六年以戶部右侍郎鎮守福建浙江蘇松十年還部詳戶部侍郎

張楷

浙江慈谿人進士正統十三年以右僉都御史監軍討閩寇鄧茂七十四年劾免詳南院僉都

薛希璉

浙江麗水人進士正統十四年以刑部右侍郎鎮守提督軍務景泰三年還部詳南刑部尚書

金濂

直隸山陽人進士正統十四年以刑部尚書參贊福建軍務平逆盜鄧茂七年還部詳戶部尚書

孫原貞

江西德興人進士景泰二年以浙江鎮守尚書兵部尚書兼制福建詳浙江鎮守尚書

劉廣衡

江西萬安人進士景泰四年以右副都御史計闕浙寇詳刑部尚書

滕昭

河南汝州人進士成化六年以右副都御史巡視福建詳兵部尚書

張瑄

應天江浦人進士成化八年以右副都御史巡撫福建詳南京刑部尚書

高明

江西貴溪人景泰甲戌進士成化十四年起左僉都御史討上杭流賊十五年養病卒

王繼

河南祥符人進士成化二十三年以右副都御史巡撫福建詳南京兵部尚書

屠勳

浙江平湖人進士弘治六年以大理寺左少卿撫漳寇

張憲

江西德興人進士弘治十八年以工部侍郎兼左僉都御史清理鹽法正德元年陞右都仍董其事三年回院

陳天祥

直隸吳江人進士正德十一年以右副都御史清理閩浙鹽法詳都察院副都

趙鑑

山東壽光人進士正德十一年以副都御史清閩浙鹽法詳刑部尚書

王堯封

直隸定興人進士嘉靖八年以右副都御史巡視閩浙地方本年開任詳南京兵部

胡連 直隸沐陽人進士嘉靖八年以右副都御史巡視浙江

朱統 直隸長洲人正德辛巳進士嘉靖二十六年以右副都御史巡視浙江福建二十八年開住詳浙江巡視

王忬 直隸太倉人嘉靖辛丑進士三十三年以右副都御史巡視浙江福建見浙江巡視

張經 福建侯官人正德丁丑進士嘉靖三十三年以兵部尚書提督浙直福建軍務

胡宗憲 直隸績溪人嘉靖戊戌進士三十四年提督浙江福建軍務三十六年加右都御史兼兵部右侍郎巡撫浙江仍提督直隸軍務詳浙

阮鶚 直隸桐城人嘉靖甲辰進士三十六年以右副都御史巡撫三十七年逮獄以後額設巡撫

王詢 四川成都人嘉靖甲辰進士三十七年以右僉都御史巡撫三十八年養病

吳桂芳 江西新建人嘉靖甲辰進士三十八年推僉都巡撫未任

劉燾 直隸天津左衛人嘉靖戊戌進士三十八年以僉都御史巡撫四十年聽調見薊遼石都

游震德

直隸婺源人嘉靖戊戌進士四十年以右副都御史巡撫四十二年爲民起督南京糧儲

譚綸

江西宜黃人嘉靖甲辰進士四十二年以右僉都御史巡撫以功陞右副都四十二年守制詳兵部尚書

汪道昆

直隸歙縣人嘉靖丁未進士四十二年以右僉都御史巡撫四十五年回籍

塗澤民

四川漢州人嘉靖甲辰進士四十五年以右僉都御史任隆慶三年卒於官

何寬

浙江臨海人嘉靖庚戌進士隆慶三年以右僉都御史任陞大理寺卿

殷從儉

廣西臨桂人嘉靖甲辰進士隆慶五年以右副都御史任

劉堯誨

湖廣臨武縣人嘉靖癸丑進士萬曆元年以右僉都任加右副都陞左副都回籍候用歷南京兵部尚書參贊機務

龐尚鵬

廣東南海人嘉靖癸丑進士萬曆五年以右僉都任陞左副都回院管事

劉思問

河南孟縣人嘉靖丙辰進士萬曆六年以右僉都任七月陞協院左僉都

耿定向

湖廣麻城人嘉靖丙辰進士萬曆六年起右僉都任八年丁憂

勞堪

江西德化人嘉靖丙辰進士萬曆八年由福建左布政陞右副都巡撫十年陞協院左副都

趙可懷

四川巴縣人嘉靖乙丑進士萬曆十年由廣西右布政陞右僉都任十二年改撫順天

沈人种

直隸嘉定人嘉靖己未進士萬曆十三年四月由太常寺卿陞右副都任十四年十月致仕卒

賈待問

直隸威縣人隆慶戊辰進士萬曆十四年由協院僉都陞右副都任十五年九月丁憂

周 宗

江西安福人嘉靖壬戌進士萬曆十六年三月由右通政陞右僉都任十七年陞大理寺卿

趙參魯

浙江鄞縣人隆慶辛未進士萬曆十七年由南太常寺卿陞右副都任本年陞大理寺卿

張汝濟

湖廣江陵人隆慶戊辰進士萬曆十九年由太常寺卿陞右副都任

勅使并巡撫福建行實

夏原吉字維喆湖廣湘陰縣人洪武庚午舉人革除中以戶部右侍郎充採訪使巡視福建公明寬大識楊文敏公榮於庠有莫使祥麟後馬牛句之贈本年事竣還部詳戶部

楊勉字■應天府江寧縣人永樂甲申進士十九年以刑部右侍郎巡視考察官吏安撫軍民本年還京詳刑部侍郎

吾紳字叔縉浙江開化縣人永樂甲申進士宣德五年以南京刑部右侍郎考察福建藩臬郡縣諸司官存陟允愷輿論詳南京禮部侍郎

焦宏字克明河南葉縣人永樂辛丑進士正統六年海寇往來


海中抄掠以戶部右侍郎鎮守福建浙江蘇松政令一新寇不爲害九年閩中復開銀場命往視視課重者請減之以利民詳戶部侍郎

張楷字式之浙江慈谿縣人永樂甲辰進士正統十三年以都察院右僉都御史兼都督劉聚兵討沙縣反賊鄧茂七平之勅還兵討浙寇詳南京都察院僉都

薛希璉字廷器浙江麗水縣人宣德庚戌進士正統十四年以刑部侍郎巡撫福建撫輯人民時殘寇羅丕復起乃請調兵討之親總軍務晝夜籌度遣人抵其壘諭曰若等皆平民苟能自新當上請賞罪不然必殄滅之無遺降者數萬逃入海者亦自

縛詣麾下悉釋之負固不服者縱兵擒斬殆盡以功陞刑部尚書景泰三年還部詳南京刑部尚書

金濂字宗瀚直隸山陽縣人永樂戊戌進士正統十四年以刑部尚書叅贊福建軍務討鄧茂七餘黨鄧伯孫平之本年還部詳戶部尚書

孫原貞字  江西德興縣人永樂乙未進士景泰二年以鎮守浙江兵部尚書兼理福建因盜平奏立永安壽寧二縣以善後詳浙江鎮守

劉廣衡字克平江西萬安縣人永樂甲辰進士景泰四年以右副都御史討閩浙寇鄭懷胃王孝心至則賊已就擒乃察其嚙

聚之故以山有銀場連亘深僻卽命伐山通道奏設縣治以便
巡視患遂息已而守臣以所獲賊屬俱論謀逆乃覈實得首者
十人餘縱之事竣賜金幣詳刑部尚書

滕昭字自明河南汝州人正統辛酉鄉舉成化六年以右副都
御史巡視福建時上杭清流之地曰紫雲臺鄧茂七之黨嘗據
之爲亂昭相其要害立歸化縣蒞之詳兵部侍郎

張瑄字廷璽應天府江浦縣人正統壬戌進士授刑部四川司
主事歷廣東左布政成化八年以右副都御史出巡撫福建初
郡縣多無儲積命各建倉廩勸富民出粟以備凶荒民至今賴
之沿海官軍先因事減支俸糧三十餘年瑄知其故令仍舊支

給官軍感恩立石頌德造闕安鎮橫港鐵索海寇林壽六魏懷
三等歲久不獲鎮守屢被劾責瑄悉擒之福安壽寧等縣地隣
江浙強賊阻塞道路乃擒賊首葉旺等餘黨盡散 勅諭有處
置得宜之褒鎮守太監盧朦暴橫瑄裁抑之事聞革去人民稱
快閩俗溺於陰陽拘忌有停柩十餘年者督屬嚴責葬者七千
餘棺詳南京刑部尚書

高明字上達江西廣信府貴溪縣人景泰甲戌進士歷南院右
僉都御史終養成化十四年起左僉都御史討上杭盜平之析
上杭溪南里置永定縣會疾不入報疏乞骸骨納勅符以去詳
南院僉都

王繼字述之河南祥符縣人成化丙戌進士任山西右布政二
十三年以右副都御史巡撫弘治三年改宣府詳南京兵部尚
書

屠勲字元勲浙江平湖縣人成化己丑進士弘治五年以大理
寺左少卿撫處漳寇至則諭以禍福誅首惡黨與悉不治時苦
旱訖事而兩閩人稱之詳刑部尚書

張憲字廷式江西德興縣人成化壬辰進士弘治十八年以工
部右侍郎兼右僉都御史整理閩浙鹽法親歷諸場炎瘴無所
避尋以考滿加右都御史仍督其事正德二年召還詳南京工

部尚書

陳天祥字元吉直隸吳江縣人弘治丙辰進士正德十一年以
右副都御史清理閩浙鹽法至浙而病歸吳江卒詳都察院
趙鑑字克正山東壽光縣人成化丁未進士正德十一年以右
副都御史清理閩浙鹽法詳刑部尚書

王堯封字

直隸定興縣人弘治乙丑進士嘉靖八年以巡

視浙江右副都御史兼制福建沿海地方本年閑任詳南京兵
部尚書

國朝列卿紀卷之一百七

總督兩廣軍務兼理巡撫序

夫兩廣者古百粵地漢領於荆交二州唐以其地隸嶺南道後
分爲嶺南東西二道宋改爲廣南東西二路置經略安撫司又
各置提點刑獄司元改爲廣東廣西二道置宣慰司又各置肅
政廉訪司至我朝定爲廣東廣西等處承宣布政使司又各
置提刑按察司并置都指揮使司三司並設撫轄軍民然國初
徭寇竊發叛服不常自洪武元年命永嘉侯朱亮祖鎮廣東而
總兵官出鎮蓋倣於此然未有文臣總制之任永樂二年命工
科給事中雷填巡撫廣西至十九年又命吏部尚書等官二十

六人巡行天下安撫軍民於是大理寺丞郭瑄給事中艾廣往廣東通政司叅議朱侃給事中楊春往廣西然事畢則罷未有定員至正統十四年兩廣多事苗寇蝟起廣東則命僉都御史楊信民巡撫繼侍郎孟鑑揭稽廣西則命侍郎李棠巡撫然兩廣地勢連接休戚相關故景泰元年廣東黃蕭養之變廣西曾動調官軍一萬之上前來策應及景泰三年廣西有韋萬秀之變總兵武毅節奏協濟而廣東副總兵董興不調兵應援彼此猜忌事多牽制及賊寇擾攘兩鎮將官互相觀望不卽勦捕朝廷更置其將簡命左都御史王翱總督兩廣軍務自總兵以下悉聽節制凡事得便宜而行於是事權歸一而提督之任遂爲

東南重鎮矣然事平卽歸非常設繫後馬昂以軍務至葉盛以
巡撫至成化元年以諸夷弗靖命都督趙輔等討之陞浙江叅
政韓雍爲僉都贊理軍務雍旣平廣寇遂命總督軍務兼理巡
撫久之雍以兩廣土地廣遠恐餘孽復生重貽邊患請於朝願
得文武大臣分理其事上命副都陳濂撫廣東僉都張鵬撫廣
西而雍專理軍務尋以憂去五年御史龔晟等奏兩廣事不協
一故盜益熾宜設大臣總督兼巡撫上可其奏起雍右都御
史總督兼巡撫於梧州開設總府居中調度兩廣副總兵叅將
而下悉聽節制而兩廣巡撫復不設仍總於總督永爲定制正
德十一年改總督爲提督嘉靖四十五年因廣東寇發遙制不

國朝及身系
卷之二十一
十一
便兵部題准總督軍務止撫廣西於廣東另設巡撫至隆慶四
年又改總督閩廣兼理糧餉巡撫廣東於廣西另設巡撫焉夫
以兩廣軍務而總於一人所以合分一雜控遐固圍計甚悉也
第地雜夷獠齊民莽伏人異其趨官異其政使撫御非道則憑
山據海相煽爲亂而東南一帶固不可晏然坐食也是於國家
安危所繫不亦重乎哉今詳各官宦履於後其行實見於事紀
其勲德著者表爲列傳

國朝列卿紀卷之一百七

總督兩廣尚書侍郎都御史年表

王

翺

直隸鹽山人進士景泰三年以左都御史任歷太子太保吏部尚書

馬

昂

直隸滄州人貢士景泰五年以右副都御史任以功陞右都左都歷戶兵二部尚書

葉

盛

直隸崑山人進士天順二年以右僉都御史任歷吏部左侍郎

韓

雍

直隸吳縣人進士成化九年以左僉都御史任以功陞左副都五年丁憂起右都御史總督兩廣

吳

琛

直隸繁昌人進士成化五年以右僉都御史任六年取回南院改撫湖廣十年以右副都任

朱

英

湖廣桂陽人進士成化十一年以左副都御史任十九年召掌院事

宋

旻

浙江淳安人進士成化二十年以右都御史任

屠

瀟

浙江鄞縣人進士弘治元年以右都御史任

秦紘

山東單縣人進士弘治二年以右都御史任

閔珪

浙江烏程人進士弘治四年以右都御史任

唐珣

直隸華亭人進士弘治八年以右副都御史任

鄧廷瓚

湖廣巴陵人進士弘治九年以右副都御史任

劉大夏

湖廣華容人進士弘治十三年以右都御史任

潘蕃

浙江崇德人進士弘治十五年以右都御史任

熊繡

湖廣道州衛人進士正德元年以右都御史任

陳金

湖廣應城人進士正德二年以右都御史任三年轉左

劉洪

湖廣安陸人進士正德三年以右都御史任

林廷選

福建長樂人進士正德五年以右都御史任

周

南

浙江縉雲人進士正德九年以右都御史任

陳

金

見前正德十年起原職再任

楊

旦

福建建安人進士正德十二年以右都御史任

蕭

狝

四川內江人進士正德十四年以右都御史任

張

貴

浙江蕭山人進士正德十六年以右都御史任

盛應期

直隸吳縣人進士嘉靖三年以兵部右侍郎兼僉都御史任

姚

鎮

浙江慈谿人進士嘉靖四年以右都御史任

王守仁

浙江餘姚人進士嘉靖六年以左都御史任

林

富

福建莆田人進士嘉靖七年以右副都御史任

陶

諧

浙江會稽人進士嘉靖十一年以兵部右侍郎兼右僉都御史任

錢如京

直隸桐城人進士嘉靖十四年以兵部左侍郎兼右僉都御史任

潘旦

直隸婺源人進士嘉靖十五年以兵部左侍郎兼左僉都御史任十六年取回南京兵部

蔡經

福建侯官人進士嘉靖十六年以兵部右侍郎兼右僉都御史任二十年加右都二十一年加兵部尚書

潘鑑

直隸婺源人進士嘉靖二十三年以兵部尚書兼右副都總督兼巡撫辭未任卒贈太子太保諡襄敏

張岳

福建惠安人進士嘉靖二十三年以兵部左侍郎兼左僉都御史任

歐陽必進

江西安福人進士嘉靖二十六年以兵部右侍郎兼右副都御史任

周延

江西吉水人進士嘉靖二十九年以兵部右侍郎兼僉都御史任

應楨

浙江遂昌人嘉靖丙戌進士三十一年以兵部右侍郎兼僉都任三十三年卒

鮑象賢

直隸歙縣人嘉靖己丑進士三十三年以兵部右侍郎兼右僉都任

譚愷

直隸無錫人嘉靖丙戌進士三十三年以兵部右侍郎兼僉都任三十六年開任

王鈞 江奉化人嘉靖己丑進士三十六年以兵部右侍郎兼僉都御史任

鄭綱 福建莆田人嘉靖己丑進士三十八年以兵部右侍郎兼僉都御史任四十年卒于官

張臬 江西進賢人嘉靖丙戌進士四十年起陞兵部右侍郎兼僉都任以功陞右都御史仍前任四十二年開任

吳桂芳 江西奉新人嘉靖甲辰進士四十二年以兵部右侍郎兼僉都任改兵部四十五年改總督軍務巡撫廣西

譚綸 江西宜黃人嘉靖甲辰進士四十五年以兵部右侍郎兼僉都任隆慶元年回部

張瀚 浙江仁和人嘉靖乙未進士隆慶元年以兵部右侍郎兼僉都任

劉燾 直隸天津左衛人嘉靖戊戌進士隆慶二年以右都御史兼兵部左侍郎任四年開任

李遷 江西新建人嘉靖辛丑進士隆慶四年任以功陞右都御史兼兵部左侍郎陞南京刑部尚書

殷正茂 直隸歙縣人嘉靖丁未進士隆慶五年以兵部右侍郎兼僉都任

凌雲翼 直隸太倉人嘉靖丁未進士萬曆三年以兵部左侍郎任加右都御史

劉堯誨

湖廣臨武人嘉靖癸丑進士萬曆六年以兵部左侍郎任加右都御史

陳瑞

福建長樂人嘉靖癸丑進士萬曆八年以兵部尚書兼左都御史任

郭應聘

福建莆田人嘉靖庚戌進士萬曆十年以兵部左侍郎任

吳文華

福建連江人嘉靖丙辰進士萬曆十四年以右都御史兼兵部右侍郎任兼巡撫

吳善

福建龍溪人嘉靖壬戌進士萬曆十五年以兵部右侍郎任次年卒

劉繼文

直隸靈壁人嘉靖壬戌進士萬曆十六年以兵部右侍郎任

兩廣督撫行實

王翺字九臯直隸河間府鹽山縣人永樂乙未進士累官都察院左都御史景泰三年廣西蠻寇行劫郡縣至六十二起延廣東地方俱被其害廣東總兵董興廣西總兵武毅互相推託擁兵自衛該訪勘御史王允奏下兵部尚書于謙舉鎮守涿州都督陳時代毅鎮守鴈門都指揮使翁信代興奏曰兩處總兵不相統攝彼此頡頏難於行事若無平日有名望大臣一員總督其事節制兩方未免各相推調不肯應援卒難成功 上從之於是命翺總督兩廣軍務一應陞賞悉便宜而行所在總兵官悉聽節制事寧回京興毅降爲事官隨征廣西提督侍郎李棠

廣東巡撫侍郎揭稽俱寫劾切責翱威望素著蠻夷聞翱至大懼翱曰蠻夷久反要在撫化得宜耳略去兵威一意推誠撫諭引其酋長向化服衆者犒以金帛酒食多見歸順思恩軍民府知府岑英頻年領土兵有勞人疑其反側翱爲居之桂林城中禮待甚厚養其土兵如父子相視由是人思効力田州知府岑紹死於家奴其已襲知府子鏞適領兵赴調家奴呂趙假義挾其出亡庶長子鑑入據府治以拒鏞鏞不敢歸思明府知府旣卒同族黃震黃道爭襲道父兄皆死於兵地方洶洶三司莫爲計或以爲震當襲翱曰夷俗何倫理之有調停之可也乃奏授鑑知府管府事鏞隸桂林總戎帳下道授知府以慰其一家被

禍之慘一時感化爲之帖靜叅將范信有才略人厭其貪兵部
因事革其職聽調翔不惑羣疑奏復其官信卒以能將名兩廣
者十餘年癸酉 欽取回京遷吏部尚書詳吏部

馬昂字景高直隸河間府滄州人宣德中貢士累官右副都御
史致仕景泰四年起總督兩廣軍務攘懷夷寇撫安軍民會蠻
寇蝟聚劫掠大閱兵士示以紀律授方略生擒僞將軍周鈇盛
盤馬蹄等以功陞右都御史丙子征斗峒賊轉左都天順元年
坐謗致仕後歷兵部戶部尚書詳戶部

兩廣巡撫

葉盛字與中直隸蘇州府崑山縣人正統乙丑進士累官都察

院右僉都御史天順二年命巡撫兩廣及贛理軍務至廣興利革弊尤盡厥心舊例廣東鹽課不出境歲久鹽積商困往往賂守關津者越過廣西市利盛以爲聽之則法壞而利歸於商禁之則商滯而利歸於關津乃請許鹽商計鹽多寡入米餉邊而後出境於是公私兩利焉先是海賊嚴啓盛坐死囚漳州府越獄聚徒下海爲患敵殺官軍拘留都指揮王雄至廣東復殺總督備倭都指揮杜信至是招引番船駕至香山洋尾外洋盛廉其實會同鎮守廣東左少監阮能巡按御史呂益命官軍駕大船衝之遂生擒啓盛餘黨悉盡海患始平又瀧水縣逍遙等山徭賊鳳廣山恃險爲惡官軍莫能制廣山死弟吉其子也襲父

之惡僞稱鳳二將軍招集各山賊首徭蠻編爲旗手殺手劫掠
鄉村攻圍城邑殺害人民敵殺官軍毀燒房屋禾倉搶擄牛羊
牲畜不可計陷殺指揮等官陳廣聚等官軍至是盛等會調兩
廣大軍水陸並進於連灘立爲總管節制號令督行都指揮胡
英在陽春魚子水歸瑄在岑溪思慮新樂徐陞在雞骨嶺韋後
在羅傍水口各進兵副總兵歐信左叅將范信各親督兵斬菁
伐木開通道路齊力夾攻直搗巢穴各賊累次迎敵官軍奮勇
擒斬首從賊徒鳳弟吉等三百四十五名顆殘黨多各餓死招
撫脅從回山住種及於附近營堡添兵固守而以弟吉等十五
名獻俘於京師地方始平三年田州知府岑紹老傳嫡子鏞頭

目呂趙挾其庶子鑑拒紹而逐鏞於外時官府令鏞寄住省

城而令鑑襲其職趙於是縱兵攻破鎮安奉議南丹向武等府

州上隆恩城上林並受其害擅爲鐵鈎吊掛之刑與販私鹽僞

稱名號私通交趾復夜殺鑑旣而鑑子玆亦故趙遂以幼孫呂

嬰冒玆名私襲其職盛會兵討之執趙伏誅四年藤縣民胡趙

成因事克軍遇革造妖構集太藤峽等徭賊攻陷諸縣治燒劫

衙門殺擄官民掠去寶家募巡司印信荼毒一方盛督行廣西

左叅將范信分巡蒼梧道副使雷復都指揮韓瑄督領指揮張

錦王銘等官兵擒斬成等三十三名顆奪回印信脅從者不治

五年大藤賊弗靖盛躬督兩廣漢達弁江西湖廣沿江等衛所

及兩廣官軍士兵壯快人等... 攻破老鼠道袍石門紫荊
金龍白崖六廟仙女關通天... 巢七百二十一處擒斬首從
賊徒三千二百一十七名... 燬房屋禾倉一萬七千二百間
追賊奪船五百三隻... 回被擄男婦五百三十一名口牛馬五
百二十匹器械五千七百一十件... 七年廣西流賊多人廣東爲
害而兩廣守將顏頤自利是以討賊不成... 功盛請革兩廣正將
立總鎮於梧州... 居中調度賊可平矣... 衆建其策而不果行... 盛不
得已請益兵... 英宗乃命都督顏彪率兵赴之... 盛與彪協謀破
賊若八百所擒斬數萬人而還... 或以殺降謗之而不知實積
年反復之賊也... 天順八年改撫宣府官至吏部左侍郎卒謚文

莊詳吏部

提督兩廣軍務兼理巡撫

韓雍字永熙直隸蘇州府長洲縣人父以間右徙實京師占籍宛平縣正統辛酉中京闈鄉試壬戌登進士第癸亥拜湖廣道監察御史乙丑奉命錄囚有碭山縣學教諭丘純因責膳夫祝磨兒其父令磨兒遁去乃告純垂死棄屍他處御史問勘誣伏尋屍偶於黃河傍得一支解者認爲磨兒屍遂坐極刑雍疑之遣人蹤跡得磨兒純由是得白戊辰按治江西吉之廬陵等縣兇徒乘歲饑劫掠勢甚熾雍與巡撫侍郎楊寧設法捕首賊二百餘人悉寘重典地方以寧聞寇鄧茂七反巡按御史江澄

牒隣境剿殺尋復止之雍曰律有反叛會捕之文使果降何憚發兵不然吾有備無患卽趣進時浙江巡按黃英以汪牒調兵弗集汪卒坐死人多咎英而偉雍十四年陞廣東副使少保陳循疏雍才陞都察院右僉都御史巡撫江西至則首行均徭歲辦法均徭者均平十排年之力役賦歲驗冊編役役畢九年無擾歲辦者里甲釀銀貯於官有役則估值支給擇戶領解人稱便焉 英廟復辟調山西副使坐累致仕戊寅遷大理寺右少卿尋復右僉都御史問決盜十八人內二人訴被同起二人繫指時左都御史寇深云會問已明柰何雍曰人命至重有詞且暫留問不實決未遲二人得留餘欲行刑雍復曰若不留指者

將誰與證始留四人後訴者得白錦衣衛指揮劉敬因石亨連坐有謂敬曾邀亨至直房同飯欲坐朋黨雍曰律之本意謂結交朋黨紊亂朝政者今敬與亨交而非亂政况亨得志時誰不蠅聚其門若以一飯卽坐此罪則曾赴宴會者何以罪之東漢時以朋黨害盡忠賢覆轍可蹈邪是冬奉勅巡撫大同宣府陸辭召至 文華殿論遣之賜寶鈔三千貫蓋異數也至則恤軍士繕城堡糾治貪蠹震懾虜志有古守邊者風癸未還議事陞兵部右侍郎會有忌之者適 英宗皇帝上賓因事遷浙江右叅政成化元年因徭酋侯大狗自景泰以來作亂嘯聚至萬人墮城殺吏而修仁荔浦平樂方山諸徭應之其勢益張天順中

能捕大獠者予千金爵一級卒莫得久之鬱林博白新會信宜
興安馬平來賓亦煽亂所至丘墟兩廣三司皆戴罪守官至是
兵部尚書王竑奏言峽賊稱亂久矣其始皆由守臣以招撫爲
功譬之驕子愈惜愈啼非流血撻之不止也浙江叅政韓雍文
武全才若以討賊之計屬之可追南顧於是陞雍左僉都御史
與趙輔討之督餉則戶部右侍郎薛遠紀功則監察御史劉慶
汪霖也是年六月雍等會南京或曰方今兩廣殘破盜賊蜂起
譬之烈火燎原無復緩急宜分兵一由庾嶺入廣東一由湖廣
入廣西隨在撲之俟其團結乃可圖爾雍曰不然兵法有云萃
於中堅先其難之謂也大藤峽爲廣西腹心之患舍此不圖而

分兵四出賊必擁而漫流流賊愈多而州縣愈破諺所謂救火而噓之也莫若併力西向擣其心腹元惡旣擒餘必投刃而解矣諸將曰然乃以官軍三萬人兼程而進七月至全州會陽峒西延苗賊爲梗出偏師擊滅之戮失機指揮李英等四人軍威大振九月至桂林議曰修仁荔浦峽賊之羽翼也不剪則心腹之患難除乃以永順保靖及兩江土兵一十六萬人五路並進先破脩仁窮追至力山生擒一千二百餘人斬首七千三百餘級十月至潯州延父老問計皆曰大藤峽天險密箐重嶺三時癘瘴某等生長一方莫得要領今兵威久振賊備益堅莫若屯兵四圍且耕且守以待其斃雍曰不然峽山遼闊岐路分披輪

困六百里間安可圖也且屯兵日久彼銳我衰睥睨之奸患起
衝突法曰先人有奪人之心乘勝之謂也今我軍新破府江勇
氣百倍峽賊聞之亦已褫魄不若因而乘之可立破也乃以六
萬八千人爲右軍總兵歐信叅將孫麒高端都指揮夏正萬宗
厓指揮王英等將之自象州武宣分爲五道攻其北以九萬二
千人爲左軍以都指揮白全楊瑛張剛王紀彭倫夏柴正指
揮唐雄等將之由桂平平南分爲八道攻其南以左叅將孫震
指揮程文昌千戶李慶等巡守左江及結五屯截其奔路雍與
輔和開府高振嶺以督諸軍令信曰山北旣破便可提兵深入
夾攻桂州橫石諸崖令正曰林峒沙田府江間道也宜越古眉

雙髻諸山伏兵林峒扼其東奔諸將受命乃十二月之朔諸軍並發腹背夾攻連破石門道袍屋厦柴荆竹踏良腦古營牛腸大咕等寨賊皆遁入桂州橫石寺塘九層樓據險立棚以抗雍麾死士以大斧刊木開道兩軍齊登發火箭焚其營柵而正又自林峒來援賊大驚潰生擒侯大狗等七百八十餘人斬首三千二百餘級望風皆散先是峽中有大藤如斗延亘兩崖諸蠻蟻渡故曰大藤峽至是斬之改名斷藤峽遂以明年正月班師於是奏設武宣縣東鄉巡檢司以土人李昇爲副巡檢貴縣北山巡檢司以土人陸善政爲副巡檢改周中巡檢司於勒馬灘以土人廖政爲副巡檢靖寧鄉巡檢司於獻俘灘以土人任中

二爲副巡檢大宣鄉巡檢司以零扶寨爲副巡檢大黃口巡檢司以陸明貴爲副巡檢與流官巡檢同事思隆巡檢司碧灘驛俱改於碧灘設武靖州於碧灘屬潯州以上隆州知州岑鐸知州事設藤縣五屯千戶所以千戶李慶掌所事土人覃仲英世襲土官吏目昇等皆久叅戎伍故雍皆任之 詔如雍議陞左副都御史提督兩廣軍務兼理巡撫賜綵段六表裏叙功賞賚子雍以與弟睦授錦衣衛所鎮撫先是雍與將士約能生擒被擄男女者准其功故無妄殺之慘成功之日士皆歛跡無譁秋毫不漁於將戍子雍以兩廣土地廣遠恐餘孽復生重貽邊患請於朝願得文武大臣分理其事 上可其奏本年以外艱去是

冬巡按御史龔晟廣東按察司僉事陶魯林錦交章言於朝以爲兩廣事不協一殘賊日熾須復得大臣提督巡撫斯濟上

嘉其言下廷臣議兵部尚書白公主集議規畫舉雍對上可

之以太監陳公總鎮兩廣起復雍進右都御史總督兩廣軍務兼理巡撫雍固辭弗獲始就任未幾復以平江伯陳銳掛征蠻將軍印充總兵官鎮守兩廣同開總府於梧便宜行事兩廣叅副以下俱聽節制前廣西鎮守大監兩廣總兵巡撫皆裁去又以少監黃沁暨署都督僉事夏正克副總兵鎮守廣西都督僉事馬昇充遊擊將軍都指揮楊廣夏鑑張壽充叅將分守諸路而地方大計則悉取決於總府宸斷也雍承制專決已久以

法繩下不貸大吏十年有上書言雍不法事若干條 上知雍
功勞遣使勸復多虛雍卽引疾再三陳乞 上知其誠惻特賜
俞允俾致仕時年五十有三雍爲人洞達愷爽篤於孝友與人
交不爲岸谷有信義發奸擿伏如神然每存心於愛人不事苛
刻秉兵權於一方未嘗濫殺一人政務填委不忘文事揮詞灑
翰思如湧泉無少凝滯嘗作江西第一樓等詩著平蠻錄多膾
炙人口云

瑣綴錄云公聰明才辯迥出流輩按江西特適閩廣處州寇發
剽掠及境公設法擊却之當時巡撫侍郎楊寧稱於衆曰韓綉
衣聰明百倍於小子官民奏留重按一年回朝陞廣東憲副不

數月陞僉都御史年三十民情吏治素所諳練風裁凜然凡臨衆決事動發百餘言皆引經援律無一語踈滯處置事務靡不允當至今官民遵守之曰韓都例繼公巡撫者皆以爲不及嘗念陳芳洲先生爲舉主赴鎮經泰和躬祭墓左流涕不已曰士爲知己者死何能報也

平蠻碑云公奉命以討有罪一以仁義誠信宅心師至之始卽律之曰夫兵凶器也聖人不得已而用之苟非以順而動不可也若等勿盡劉無辜勿濫容首惡勿遏彼之來降勿爽我之號令斯事濟矣衆咸曰諾於是發偏師先征荔浦修仁西延陽峒然後移兵斷藤橫石等八百餘寨所過之地如振稿如破竹自

成化乙酉冬十一月至丙戌春正月凡五征不克者一舉而平之

又云取勝之師必在於速戰乃召官軍面授方略水陸並進是歲七月一戰而克遂以七軍之在行者分爲五路八月進全州興安凡若干戰賊大敗九月又往廣西五路發兵進討荔浦修仁十一月師至大藤峽又釐爲二十五哨固守衝要四面夾攻賊預備險阻牢不可破以滾石欄木長鎗毒矢抗敵公忿然曰吾受天子重託生靈命脉在此一舉事若少緩則民兵膽喪鉅萬之衆肝腦塗地又曰文王之師攻必緩戰必徐者欲俟其革心順服而全之也公復下令且招且撫致附者一萬三千其

怙終者則天誅不可留乃申嚴號令以身先之肆兵前進萬衆
騷呼聲搖山嶽一戰而渠魁就縛羣兇失怙免竄狐遶旬月之
間夾破寨峒五百乃州治其地設巡司六擇其夷心信者數人
授以土官而約束撫安之施以實惠量給以田使之耕各遂其
生

畜德錄云都御史韓雍征大藤峽出兵令五鼓戰將領者聞賊
已覺恐遲失事二更即發大破之公賞其功而問以違令之罪
以軍法當斬乃具聞請釋曰萬一不用命而敗奈何人謂公得
將之體

野記云韓中丞兵入大藤或青袍巾數十人出林中執香拜伏

軍前問之曰我等悉良民向執公役爲賊掠至官軍累征未嘗
深入無緣殄滅今公至此我等必得脫奔鑊矣韓厲聲言曰爾
等皆賊敢欺我耶命悉裸而斬之果皆有短兵藏於衣乃盡支
解之隨兵入路散懸身首於樹夾道不絕峽中酋聞之驚呼曰
天神至矣極力拒敵不支遂平之公膽力絕人初得賊首帥取
其頭傾腦飲之却命將校飲之多不能也又兩司官集議兵適
引賊數人公握刀付之一布政曰公可手斬此賊布政戰縮公
歎曰公談兵何美殺一係囚猶爾臨陣當何如耶自持刀連斷
數人頭衆懼有駭絕者其類此甚多故軍中與賊皆畏之如熊
虎比聞其死祀之爲神

吳琛字與璧直隸太平府繁昌縣人正統甲子登鄉榜乙丑戊辰兩試禮闈不利益勵於學一夕方讀書嘔血數升母蔣氏驚往視之戒勿復學曰脫以是戕生學亦奚爲而琛竟不少輟但掩覆無使毋知居數年學大有進景泰辛未登進士第援例還家畢姻先已久聘章氏葢不第不娶至是始娶年二十七矣癸酉秋拜雲南道監察御史奉勅往甘州犒軍乙亥巡按四川所至黜奸貪雪冤滯明達果斷蜀人懷之天順丁丑英廟復位武靖侯石亨以功封忠國公專權自恣漸畜無將之心琛與同官劾奏之忤旨補外知遷安縣五日天變雨雹命還臺職尋選居臺端掌文案故事凡三司會讞獄囚十三道文移行牒

必擇老成諳練御史二人綜理之蓋以裨總憲之不及而爲諸道之領袖時琛與同年高明對筦五年臺中稱賢辛巳陞大理寺丞歲餘陞都察院右僉都御史巡撫甘肅西陲莊浪去城四百里有地深入狄境前檢田者占數屯糧五千七百斛迫於徵輸軍多竄匿琛首疏罪之西番扒沙巴哇等七族累歲盜邊撫之不服協同平羌將軍宣城伯衛穎征勦之斬獲千三百級馬馳牛羊甲仗輜重無算賊平陞俸二級成化改元還朝議事適四川妖人趙鐸謀叛改命琛往討鐸敗中止留蒞臺事時准揚薦饑尋命賑恤琛勞心焦思凡事有益於救荒者率以便宜行之而言多切直大忤權貴雖民賴以濟而琛之謗滋矣明年春

召還言官劾奏必置棄於法環危甚顯 天子聖明第遷官南
臺時代者都御史林忠於奏所行事一無更張且言於人謂琛
實有益於民無負於國於是其誣遂釋而聲稱益重來南未幾
兩遭親喪哀毀踰禮 朝廷凡兩遣官諭祭已丑服將終遣使
齋 勅卽其家授之命巡撫兩廣纔半歲代回南臺未至復遣
使以勅授琛巡撫湖廣時已數月不雨民嗷嗷望哺琛禱祈不
數日雨露足自是拊循郡邑問民疾苦窮荒僻陋之區無所不
至凡在湖廣者五年威行惠施殊俗輯和會寧夏花馬池韃寇
入境兵部以琛嘗在邊方熟知軍務擬奏巡撫陝西都御史徐
廷璋易置而湖廣鎮守三司又從民之欲兩上章留琛甲午有

旨許留進右副都御史適總督兩廣都御史韓雍致仕朝廷
求繼韓者僉謂非琛不可於是掇琛以去去之日郡邑父老扶
携攀送齋谷涕洟而琛亦爲之悲不自己當時士大夫言巡撫
大臣能深得軍民之心如琛者前此蓋未見也琛至廣其撫民
無異湖湘而於訓兵練士則尤加之意蓋嶺南寇盜雜處其爲
患尤非他方比也英德流民羅英郭瓊輩聚衆剽掠命兵擒之
新會新興連界有劇賊嘯聚流劫村落餘十年琛一旦滅其渠
魁殲其黨與六百餘人徭徭聞之大駭相戒歛迹柳慶諸州其
巢穴也琛親至其地檄召之許以自新詣軍門俯伏聽命者日
以數萬琛曉以禍福無不踴躍而去時識者又謂廣寇冥頑可

以威懼而不可以理喻而革心向化如琛者亦前此未見也成化乙未八月卒於官壽五十有一琛爲人勤敏自童齡至沒齒無日不雞鳴而起二鼓而寢雖閭外事叢酬應絕無壅滯少有餘閒博觀羣書以資聞識上自公卿大夫下自閭里後生書教往復靡不手答動輒盈幅初若不經意者而文理通貫情意乎洽雖屬草有所不及身居顯位其自處一以謙抑待人無貴賤必以禮處故舊無相忘有所饋遺纔及金帛輒辭不受其平生所得俸祿又日費於賓友故子姓衣食或不給身歿之後資業蕭然視先公所遺不長尺寸人皆服其操云

朱英字時傑湖廣郴州桂陽人正統乙丑進士累官都察院左

副都御史成化十五年 上以兩廣久困於兵命總督軍務兼
理巡撫兩廣用兵以來戎帥喜邀功每有小寇輒張大賊勢英
深知其弊下令撫緝徭徭各安生業約飭將士寇來不許輒進
兵諸峒氓有倡亂者購首惡誅之而釋其黨田州知府岑溥與
其叔思平知府欽內屬久有頭目黃明者忝溥祖母而間離其
叔姪劫衆以叛總帥請用兵英曰何事於兵吾將使岑氏送其
首耳乃遣間使密諭欽誅明以雪家門之恥欽感泣遂斬明父
子傳首軍門十六年平鬱林州木頭等峒蠻賊它如天河荔浦
尋融間皆巨賊巢穴莫不畏服乞供職貢事聞 上賜勅褒諭
陞右都御史食從一品俸交趾侵老撾連歲戰爭 勅詢處之

之宜英奏曰交趾叢爾國不過與老耄爭地耳遣使諭之彼當悔悟不可輕用兵 上用其言交人感愧隨上表謝罪且貢方物居兩廣幾十年至成化十九年召入掌臺事歷加太子太保詳都察院

宋旻字弘澤浙江嚴州府淳安縣人登景泰辛未進士授大理寺左評事天順 年陞本寺左寺正八年陞本寺右寺丞成化五年陞大理寺右少卿八年陞大理寺左少卿十一年陞大理寺卿二十年陞都察院右都御史提督兩廣軍務兼理巡撫二十三年致仕旻爲人厚重接物詳慎謙抑在棘寺年久以仁恕稱及在兩廣承韓雍平定後號稱無事旻亦無所表見至 武

宗卽位以年八十已上遣使卽家賜以白金支綺鄉邦榮之

屠瀟字朝宗浙江寧波府鄞縣人成化丙戌進士由御史累官都察院右都御史二十三年忤李孜省黨出南院時占城王古來爲安南所侵侮率國族奔船廣東訟寃於朝議遣官而人

皆難之時李黨因欲傾瀟薦瀟往命下物議怖恐有私爲謀者曰盍以勅示衆猶可別圖避就毋落其機奔瀟笑卻之卽日

戒行比至獻策者或曰安南藩臣也當爲問罪之舉或曰占城脆弱遣回國莫保後艱且留置之瀟曰用兵則毒民畏強則取侮皆弗聽乃詣蒼梧諸郡覘知其情狀移檄安南諭以禍福俾圖逆順安南大恐辭對甚俛瀟曰此所謂不戰而先奪之氣矣

可因撫而兩存之遂置安南而召古來諭歸國瀟欲以軍護其歸守臣不肯乃召募千人習武事乘海舶以往纖忽無勤民者古來感恩以金銀器飾異香番木若干獻謝瀟麾郤之既歸國復遣使馳謝并以聞上嘉其誠命受之辭曰綏遠之仁繼絕之義在 聖天子臣何功之有 上令貯禮部自是二國輯睦弘治改元奉 勅總督兩廣軍務兼理巡撫以親老乞終養不允留廣未一年斬獲徭僮數多 賜絲段銀兩柳州諸處戍軍舊皆番調風土殊習比代死亡過半乃爲區處分守多所全活二年 勅還掌院事詳都察院

秦紘字士纓山東兗州府單縣人景泰辛未進士弘治元年歷

漕運左副都御史二年進右都御史 命總制兩廣先是後山諸賊爲患有年乍服輒叛監司議謂彼速天誅罪不可宥絃等乃調取漢達官軍土兵義勇民壯行委湖廣按察使陶魯統領時魯帶管嶺西道用事軍門魯誓於衆曰先平瀧水而後後山可破也卽行叅將陳皞都指揮白玉馬義統督各官進攻瀧水舍舟登陸深入石狗紅荳雲陽白梅火燒風門鐵場諸山分守要害擒斬首從賊徒五百三十九名顆奪回被擄男女三千一百名口俘獲賊屬一百四十名口賊使器械三百六十七件瀧水悉平自是順流而東駐劄太平營魯行廣州府知府林泮勘畫地圖給領旗榜管遣都指揮馬義李敬何清率領指揮孫璧李

寅謝謙楊玉等官軍并土官目兵分爲四哨攻破野鴨山員魚
坑藍糞山青芒黃崗鐵岡白雲禾谿乍平小長江金坑黃竹長
坪等山擒斬首從賊人首級一千八百七十四名顆俘獲賊屬
一百五十七名口奪回被擄男婦二百零七名口脅從盡釋地
方始平時總兵官安遠侯柳景貪而不法具列其狀劾之逮下
刑部獄追贓鉅萬褫其爵景挾戚畹於內降冀減其贓且撫他
事誣紘以圖報陷洩已忿紘亦被逮赴獄坐免臺諫交章論救
三原王端毅公恕時在吏部亦極言其當大用後乃起爲戶部
尚書紘爲都御史風采益峻御史姜紘輩不職劾之皆貶謫去
臺綱肅然人謂有頌佐之風至太子少保戶部尚書餘詳戶部

閔珪字朝瑛浙江湖州府烏程縣人天順甲申進士累官刑部右侍郎弘治四年陞右都御史總督兩廣軍務兼理巡撫番陽瀧水柳慶平樂徭徭相繼爲亂令其下討平之其討古田也都督馬俊及叅政馬鉉敗死時以致敗自俊乃引咎自劾時議又欲濟師珪謂罪止首惡乃設重購緝之已而賊果自縛以歸及歸功於下安南使臣奏入貢道憑詳龍州輒爲所梗 詔下處分珪曰是亦各有罪焉乃行安南毋得挾私貨行憑詳無得阻貢物二夷爭遂息在兩廣通行鹽之法而軍儲以濟立定順長官司而蠻人不爲變八年進南京刑部尚書詳刑部

唐珣字廷貴直隸松江府華亭縣人天順丁丑進士授合州知

州成化中歷南京

司郎中福州知府湖廣左叅政右布政

使二十二年陞順天府尹弘治四年陞都察院右副都御史巡撫順天等府整飭薊州兵備六年以母憂回籍八年仍起都察院右副都御史提督兩廣軍務兼理巡撫九年卒於官

鄧廷瓚字宗器湖廣岳州府巴陵縣人景泰甲戌擢進士第明年授知浙江淳安縣成化己丑遷太僕寺丞時貴州新設程蕃府府在萬山中百具未舉加以夷獠雜聚猝難撫治吏部求其人得廷瓚推以往比至悉心規畫榜諭諸夷使受約束政令公平莫不感化懇田不踰入市不擾四境晏然上司交章舉薦吏部以民夷方安其治宜久任以慰之九載始擢山東布政司左

叅政提督農兼管水利弘治戊申再擢本司左布政使明年貴州缺巡撫拜都察院右副都御史奉勅行俄丁憂服闋適貴州黑苗久叛益肆上仍勅瓚往視兼提督軍務尋改巡撫提督如故初至遣人百計招撫不從始決策征勦號令嚴明將校用命斬首幾六千級生擒二十餘口械首惡數輩赴京悉斬於市寇既盪平上奏都勻清平舊設二衛所屬合九長官司其人世祿驕縱稔惡釀患今幸黨惡削除非大更張不能爲保境安邊之計凡所條陳十一事下兵部會議悉見施行始設都勻府一獨山麻哈州二清平縣一更擇流官土官兼治初廷瓚遣養子夔之子乾馳入京報捷朝廷旣授乾以錦衣衛所鎮撫

卽下詔褒有首決用兵之謀共成平賊之功之語遂進右都御史貴州旣無事八年召還掌南京都察院事九年兩廣缺人有總督軍務兼巡撫之寄性不瑣瑣細故至是益思以安靜爲治吏屬有賢勞者輒舉薦以勵其餘或不職特去其一二大甚者若諸司濫設悉奏除之顧羣蠻以掠民爲常往往出沒閩楚諸郡乃以都御史金澤巡撫偏方非宜以江西一省全付之使一二司並聽節制庶軍馬錢糧可以調度其湖廣衡州設兵備憲臣合治所於郴州爲便又以廣東瀧水爲賊巢宜卽其地設千百戶所調遣新軍守禦仍宜給與隙地屯種以爲久計奏上悉從之廷瓚於羣蠻結以恩兵不輕出出則成効若鬱林州雲壩

大桂諱種作亂以次平之其後四會等處乘機竊發其勢尤熾未幾首惡李景光覃傑及其黨二百餘人悉被斬獲兩廣竟亦無事因出入溪谷衝冒瘴霧染病乞歸甚懇 賜詔勉留特遣醫往視仍進左都御史以酬其功十三年 上知久勞邊務召還復掌南京都察院事未行以疾卒詳南京都察院

劉太夏字時雍湖廣華容縣人天順甲申進士弘治庚申進右都御史總督兩廣軍務勅使臨門卽携二僮以行兩廣人士聞其來如饑兒之得乳母旌賢才斥貪穢裁冗費更役法上下不便者一切正之廣人駸駸樂生矣先是知府黃智永生子長英次敬又次鍊英先智永故而英子鈞當襲敬之子澆欲立其子

理乃賂思明府牘申以子理當襲藩司駁其妄將罪之理遂糾遷隆峒王愷兵攻州奪印官司擒理下太平府獄暮夜越出仍授愷兵破執鈞子濟漢支解之大夏以兵擒理伏誅又左州土官絕改流官治之士人黃金挈家僑居上思州後歸賂吏目趙綸疏金係官族當復土職至是又賄吏目汪文疏之俱不報會督府徵兵於州金願充頭目率兵以從旣而違期府遣州吏目黃文通促之不發乃火其營金忿遂與其黨率所領兵還攻州治焚文通家殺其子武盡掠州民貲畜屯聚自保大夏遣兵捕金下獄誅之壬戌陞兵部尚書詳兵部

潘蕃字廷秀浙江嘉興府崇德縣人咸化丙戌進士由刑部主

辜累官南京兵部右侍郎弘治十五年陞都察院右都御史總督兩廣軍務兼理巡撫地方先是思恩府土官岑濬涉書史知吟咏而狡黠兇狠左右少有過失動遭殺戮部下甚憚之以故兵力雄於右江弘治癸丑田州府知府岑溥爲子琥所弑府目黃驥誅琥恃力與府目李蠻爭權構兵因侍溥母岑氏及溥季子猛赴三府愬以猛襲溥官遣官送還府驥復誘猛奔梧誣愬李蠻以兵拒猛督府復遣官送猛至賓州兵備副使汪溥檄濬以兵衛之濬用驥謀脇猛入思恩與驥分地以酬誅琥之勞始發兵偕驥送猛歸因欲襲李蠻殺之蠻知之以兵拒守工堯驥不得已復以猛歸思恩岑氏慮猛爲濬所圖愬於總督御史鄧

廷瓚遣官取猛不發踰月再遣副總兵歐磐布政程廷珙往征之濬始送猛於三府令暫寓省城濬與猛自是讐矣於是濬蹙城於田州丹良屯州椎客舟鹺貨遏公使不令入田州又糾泗城州土官岑應連兵五萬破田州李蠻走副總兵歐磐副使雷士稱以兵衛猛回府追勘濬所奪田州土印記及撤所蹙丹良石城濬弗聽而屢寇恩城果化上林破工堯陷田州猛走免癸亥寇永定永順二長官司奪據其地蹙都陽等寨石城十有八所尋復破工堯陷田州猛以數騎奔歸順州濬擅廢猛官以土族岑洪爲知府俘猛祖母暨妻子婦女九百二十九人送思恩府幽於別室殺戮府境兵民男婦無筭遣兵追猛於歸順傳檄

左江養利諸州暴猛罪狀令勿納且令相爲犄角至是蕃請兵討之克諸關隘濬走舊城副使姜綰等率兵圍之濬自經死而首詣三府梟諸市遷其母孫兄弟於福之懷安妻妾子械送京師入功臣家爲奴於是改流官知府以守之又景泰年思明知府黃瑠老傳位於庶子鈞而嫡子鉢怨之謀於瑠之弟玠玠遣其子震以兵襲瑠鈞殺之尋玠鉢皆爲官兵所獲而震與其子紹遁入龍州成化戊子總督都御史韓雍始捕震誅之紹度不得免遂治兵於况村乙未破思明州與其長子文昌乙巳又破下石西州與其次子文盛弘治甲寅又破上石西州與其次子文華丙辰遣兵陸光鶴殺知府黃道之子光燮尋又遣兵趙保

安刺道死之遂據有府治至是審命副總兵歐磐率兵破之紹
飲藥死文昌忿復連年剽掠而遷思明治於况村築城以拒乃
復遣恩城土官趙忠順以計擒之文昌等詣軍門寘於法自琚
至文昌亂凡四世皆誅十八年召爲南京刑部尚書詳南刑部
熊繡字汝明其先江西豐城縣人四世祖以下始沾湖廣寧遠
衛籍成化丙戌進士累官兵部左侍郎性剛方清介與人寡合
而人亦未嘗敢以私干大司馬劉大夏甚器重之凡邊情重務
必與商確而後行嘗奉 命清騰驤四衛勇士得其虛冒糧餉
者幾萬人由是權貴皆銜之時 孝宗敬皇帝勵精求治召二
三大臣商治理劉大夏洎左都御史戴珊尤被親近而繡與焉

未幾 敬皇帝上賓衆嫉之因舉爲右都御史出撫兩廣蓋遠之也旣而劉大夏亦乞歸矣繡至廣首征獞苗之負固者餘皆以恩撫之地方悉定舊例供應甚厚一切裁革日惟廩給數升而已正德丁卯逆瑾用事密使人踪跡之其人回歎曰熊某廩給無一毫過誤可指吾且奈何瑾竟不能害正德二年乃取回南京掌院事尋傳奉令致仕詳南京都察院

陳金字汝礪湖廣德安府應城縣人成化壬辰進士累官右都御史正德二年 命總督兩廣軍務兼理巡撫時柳慶鐘寇殃民金命官討平之陞左都御史仍前任三年陞南京戶部尚書歷都察院左都御史丁憂會江西猺賊爲亂起總督江西等處

軍務事平終養十年再起原職加太子太保總制兩廣軍務兼
理巡撫先是府江東西兩岸大小桐江洛口仙回古茂出冲斷
藤峽朦朧三黃等處村巢接壤道路崎嶇唇齒相連聚眾糾合
劫船殺人久爲府江之患至是金等督調三廣漢達官軍土兵
分爲六大哨行兩廣按察使宗璽布政使吳廷舉副使傅習張
祐左叅議張九達左叅政蔣曙副總兵房潤鎮守太監傅倫叅
將牛桓張祐陳義都指揮魯宗貴王英鄭綬等統領水陸並
進俘斬七千五百六十九名顆餘黨撫平又流賊龔全福寇連
州連山樂昌偃以次勦定十二年召回掌院事加少保兼太子
太保都察院左都御史詳都察院

劉洪字希範，滿廣承天府鍾祥縣人。成化戊戌進士，累官右副都御史，巡撫四川。正德三年，會兩廣缺巡撫，擢爲右都御史總督軍務，得便宜從事。值時勢艱危，民多燬屎，洪朝謀夕慮，惟安輯是圖，不遑啓處。嘉靖一郡河源龍州興寧程鄉等四縣，東與福建武平北與江西龍南諸邑爲鄰境，山嶺聯亘，道路嶮巇，盜賊竊發，卒無寧歲。而賊首若林，貴謝祥鍾仕高輩聚兇號醜，恒至萬餘人，攻劫焚虜，慘不忍言。人甚苦之，洪訓兵積儲百需，咸備。卽督率羣師兼調狼兵，合數萬餘，勵氣奮勇，直抵巢穴環圍而攻之。甫兩月，俘斬七八千人，追回被擄男婦一百五十二名，口奪獲資畜器械無算。諸兇盡戮，餘黨悉平。捷聞，上賜勅獎。

諭兼白金文綺廣東韶州屬邑樂昌仁化與湖廣郴桂徭賊構
逆復調狼兵及官軍二萬捕誅無孑遺上復有白金文綺之
賜兩廣用兵惟調取狼兵資費甚大其道經水陸所在蹂躪不減
於賊洪處置悉預紀律亦嚴尤責令土官禁土兵侵掠之患民
得不擾五年議削平府江蠻寇之策方擬入奏尋改南臺掌院
事詳南院

林廷選字舜舉福建福州府長樂縣人成化辛丑進士由御史
累官布政使正德四年陞南京大理寺卿五年陞右都御史命
總督兩廣軍務兼理巡撫在廣數年無事可紀九年陞南京工
部尚書詳南京工部

周南字文化浙江處州府縉雲縣人成化辛卯以邑弟子員薦於鄉戊戌舉進士授六合令勤政恤民省刑均賦去之日挽留塞道民有一舟如水之謠歲癸卯擢監察御史出則按近畿以及廣東皆著風裁入則總諸道章奏臺中稱能遷湖廣按察司副使遭父喪服闋改江西進按察使所至稱廉明薦剡交屬時宰或忌之南抗疏且去銓曹惜之改任廣東未幾陟江西右布政使弘治十八年召爲副都御史巡撫大同邊事多所籌畫虜常一入輒告捷有文綺白金之賜加俸一級俄以母喪去位逆瑾以查盤邊糧草興大獄就逮詔獄半載改獄大同嚴刑淹禁扶病奔頓見者流涕南竟不謀賄亦無以賄也正德五年

寘鑄反赦天下隨命復職聽用瑾愠其不叩門致謝俄矯詔復黜爲民再繫大同獄比瑾誅乃得免六年命巡撫宣府引疾徑歸朝廷憫之正德辛未江閩廣三省交界山谷大帽山等寨賊首張番壇李四仔鍾聰黃錦等流劫攻陷寧寧化石城萬安等縣僭號稱王命巡撫南贛汀漳地當四省之衝時方多事綏靖得宜惡黨悉平會諸道合兵勦寇江西兵從安遠入破寨七擒斬賊首何積欽羅得清等廣二寨寇入破巢九擒張番壇李四仔等福建兵從武平入破巢八擒斬謝得珠劉隆等九年以功受勞賜擢右都御史督兩廣軍務兼理巡撫廣人聞南來不勞而定南知累歲兵後民思息肩乃弛威布德惟飭

長吏勸農寬賦痛省浮費以身先之一二年間民得稍蘇息十年辭歲至八疏優詔許焉乘傳以歸月有廩歲有夫役家居十七年聞時事未嘗不動欣戚官府事未嘗有所與至小民受害未嘗不直言或取尤終不顧其儉素出乎天賦在官惟菜食兩奔喪皆卽日就道不受餽奠屏去葷酒蕭然一室垂禪如初喪見者難之居常手不釋卷尤精意文翰所著有知白齋稿盤錯集和許郢州詩集奏疏若干卷行於世性剛嫉惡而中實有容故能以功名壽考終享年八十有一爲御史時任職舉刺必應條務存大體出按必先鋤擊強豪糾繩污濫發奸如發蒙一切細故略勿視在廣文武震懾或望風解印綬去後再蒞廣位益

尊望益重然父老至今傳述必曰周御史周御史立祠焉贈太子少保

楊日字晉叔福建建寧府建安縣人弘治庚戌進士歷戶部侍郎累陞右都御史正德十二年總督兩廣軍務兼理巡撫抵任乃肅紀綱飭武備省刑獄汰苛濫百度燦然一新會番禺清遠河源等縣蘇峒十八山滴水巖青龍崗帽子峰等寨獠獍負固稔惡所過大肆焚掠民甚苦之乃調集官軍土兵命僉事王宗源都指揮董禎等分道並擊斬級一萬一千有奇奪回擄掠男婦二百三十有奇牛馬輜重不可勝計鎮守太監王堂總兵撫寧侯朱麟以捷聞 聖書褒獎兼有駢蕃之錫云己卯秋宸濠

之變南贛撫治都御史陽明王公咨援兵卽委兵備僉事王大用朱昂都指揮歐儒於大經整兵以行仍會總鎮總兵檄副使汪鉉都指揮董禎達官都指揮馬英率驍勇五千繼之而鉉意不欲乃鼓浮言以惑衆且恐其敗事遂改委僉事王大用統領直薄南昌前後凡九咨王公又咨巡撫湖廣都御史秦公因選達兵三萬餘將親率以往焉尋得報元惡已就擒地方底定遂罷行田州府土官知府岑猛者思恩府土官知府岑濬族黨也弘治年間濬亂降級指揮僉事因功陞指揮同知寅緣奏辨覲復其官會龍州知府趙源亡嗣襲以姪相猛因黨其妹所立假子韋璋者賂京還驛使詐傳詔旨起兵遂與璋襲破龍州逐

知州趙相乃賂遺本兵及富國者猛圖以功贖罪復原職璋圖
冒趙宗奪龍州請託於旦執不可富國者廣人也子弟素與叛
人通而本兵司馬擅作威福巡撫者歲有厚餽旦獨無二人交
怒又嗾巡按廣西御史曹珪誣劾旦素清謹吏部爲之駁白詎
竟不行未幾聞母周夫人計奔喪歸家哀毀踰禮先是巡按御
史汪珊特薦其賢嘉靖壬午服闋遂起掌南院詳吏部

蕭紳字凌漢四川成都府內江縣人成化辛丑進士授霍丘縣
知縣二十年陞刑部主事弘治元年陞刑部員外郎○年陞浙
江僉事十○年陞陝西兵備副使正德四年陞河南左叅政本
年冬陞山東按察使五年陞山東右布政使本年陞○左布

政使六年陞都察院右副都御史巡撫保定七年下獄爲民九年再起巡撫貴州十年改撫河南地方本年改巡撫陝西地方十一年改南院右副都御史十四年陞都察院右都御史提督兩廣軍務兼理巡撫先是古田賊韋朝威伏殺副總兵馬俊叅議馬鉉其後益熾古田及永福邊山靈川七都百有餘里皆其巢穴久爲民患至是會巡按御史曹珪廣西鎮巡三司各奏調兵大征時鎮守太監傅倫副總兵張祐奉 勅調集三廣漢達官軍士兵民快凡四萬七千三百有奇分爲五道大哨而進竟莫有深入者而洛容等折落清一鄉平民各良種忿復亂陷洛容縣竟從招撫而散左州土人黃金先謀復土官不克而死

後有韋廣明者復冒黃族求復知府鄧炳訊其詐繫廣明於獄杖殺之至十五年炳往征古田以知州李欽承攝府事訓導游漢攝州事廣明弟廣隆乘虛聚兵縛漢而脇取州印奔下雷峒种檄炳遣生官趙元瑤許世忠往征之元瑤購得印世忠購得廣隆下府獄杖殺之盡索其黨真諸法十六年封川縣石硯山大和雞峒山猺龐古子盤古義糾合開建縣之玉小玉大臺賀縣峒金上峒下峒山猺大肆流劫殺擄人畜斃殺官軍种調集漢達官軍土兵一萬三百二十員各分三大哨副總兵張祐副使張祐左哨左叅將趙承序右叅將張拯僉事陳綱右哨都指揮卜玉許英僉事楊必進分道討之俘斬六百一十九名顆地

方始平本年致仕

張嶺字時峻浙江紹興府蕭山縣人成化丁未進士累官右副都御史養病正德十六年陞右都御史提督兩廣軍務兼理巡撫初上思州隸思明府弘治庚戌土官黃智永故孫鰲襲爲其族黃理所殺族絕改立流官隸南寧府正德丁未思明府知府黃賜謀復州詐以鏐爲智永孫宜襲州目訐其詐賜意沮乃噉鏐糾遷隆峒兵劫隣境攻州弗克總督都御史林廷選遣兵捕鏐繫潯獄有僞爲公牘下潯釋之鏐復與其黨殺掠州境至是嶺督官軍勦之鏐走匿生漆山獲之檻送三府并俘其妻子鏐死於獄仍棄市嘉靖二年嶺西賊蔡猛三聚新寧恩平縣白水

白玉萌等賊衆至數萬人僭稱名號剽掠鄉村至燒蓮塘驛舍爲害年久嶺調集漢達土官兵二萬八千六百餘員名分爲大哨討之俘斬一萬四千名顥又福建上杭賊首江小范四等集徒構亂糾合隣界江西安遠廣東程鄉無賴梁八尺黃萬山賴廉等流劫漳泉官兵追敗突劫程鄉等縣鄉村嶺調發兵漢達土官目兵打手二千餘名委達官都指揮李翺嶺東守巡僉事施儒左叅議孫懋守備都指揮楊懋分道與福建官兵夾攻俘斬五百餘名顥三年歸善縣李文積招集奸宄教習武藝蓄買馬鞍私造關防票帖擅用頭踏嚮器開旗流劫鄉村占奪田地官兵捕之久弗克嶺調集漢達官軍打手鄉夫七千餘員名

委守巡嶺東道左叅政徐度僉事施雨督同守備指揮程監同知莫相指揮劉璟等領勦俘斬一千一百三十二名顆地方遂平本年召掌南院歷南京工部尚書詳南京工部

盛應期字斯徵直隸蘇州府吳縣人弘治癸丑進士累官右副都御史巡撫江西嘉靖三年陞兵部右侍郎兼僉都總督兩廣軍務兼理巡撫先是思恩府土官岑濬誅改設流官始以夷民編戶諸酋多不便因相構亂嘉靖壬午劉召謀復濬姪謙土官守備都指揮孫震覺之下謙獄謙死頭目劉召復欲立濬庶弟漢之子權乃據南海堡五里之地有衆五千餘人又占武顯等三里殺李煉及生員韋光提督都御史張嶺檄兵備副使鄧炳

參將李璋等率兵勦之時調土官岑猛兵猛子邦彥後期致兵
敗震被執炳璋等於是佯許權復土目召乃送震歸璋等尋以
兵入思恩破威骨寨召遁岳梅寨適嶺被召還應期代之督攻
益急賊危威璋謀誘守者爲內應以三月晦克之焚其巢召墜
火死函首詣軍門四年回籍後起工部右侍郎管易州山廠六
年陞總督河道左都御史八年劾免詳河道

姚鏞字英之浙江寧波府慈谿縣人弘治癸丑進士累官兵部
侍郎嘉靖四年命提督兩廣軍務兼理巡撫先是田州土酋岑
猛兵精將勇正德壬申發其兵至江右撫之東鄉饒之桃源皆
劇盜也猛以兵滅東鄉之盜納桃源之賄陰使盜逸去殺平人

以報功猛受賞還田而桃源之賊復起殺副使李清執參政吳
廷舉莫不歸罪於猛猛既輦華林東鄉桃源諸盜之金帛以億
萬計自是富甲兩江而兵勢益銳猛遂屠龍州殺土官知州趙
相之二子又攻泗城州殺知州岑接屠戮甚慘又殺歸德知州
王通又強立泗城州官族岑誅始毒死叅將甘霖又毒死指揮
方震又毒死通判龍進始結劉瑾中結宸濠包藏禍心自雄一
方上思州土目王料之叛思恩府土目劉召之叛猛皆陰主之
而陽出兵征討軍門省諭猛若不聞遇一有調遣獨猛偃蹇不
聽節制凡諸土兵之進止多寡遲速皆聽命於猛而不知有軍
門之號令者六七年矣巡按御史張鉞明其罪狀既而御史江

淵謝汝儀相繼奏之都御史張崱盛應期太監鄭潤總兵官朱麟亦奏之於上隆州武龍州安德州舊田州兼州陽縣猛皆殺其守令毀其印爲鉞而刻牙代之凡慶賀貢獻之類則以印章署舊守令名以行此其罪尚在未數也鎮時猶在嶺外方以猛爲憂盛應期已奏調諸州及湖廣永順土兵克期進討兵部悉從其議鎮至蒼梧始聞盛議勢不可止恐愆師期倉卒調兵集糧而內守備虛弱訛言洶洶岑猛將順流而下正月猛揚兵大灘二月造舟果化三月潛師窺武緣偵我有備乃止鎮亦遣使調猛兵以弛其謀又開諭猛使束身歸罪當請於朝待以不死猛請守巡官坐鎮田州然後如約鎮笑曰此非猛來降乃欲

以兩司爲辭以自逭其罪耳若墮其計必將遺笑四方不許猛亦終不聽撫 世廟以岑猛搆亂復問勦撫之宜卽上疏略曰岑猛一土酋耳其初本爲思恩知府岑濬所逐致勞 朝廷興師討濬猛始得以自存時降猛爲福建千戶亦待之厚矣猛擁兵自固 朝廷重扶弱之義復以猛爲該府同知猛自是已有玩 朝廷之意矣然猛於江西有殺賊功賣放賊路 朝廷重錄功之宜復授爲指揮同知特赦其罪自是益有玩於 朝廷且輕視中國之兵馬矣猛姦雄日長漸不可制構成亂階已餘十歲誠有如汪淵謝汝儀張嶺盛應期鄭潤朱麒所言者顧 朝廷屢施寬假之恩而猛愈肆不恭之罪猛之當誅於今已緩臣

竊惟廣南之猺獞非土官不可得而治土官之桀驁不誅岑猛則亦不可得而用蓋近日之土官猛之威足以脇之猛不誅則土官未有懲也故欲撫猛以圖目前之安是猶養虎以貽他日之患臣不能爲此以誤國家但猛所最忌者惟湖廣永順保靖土兵而已土兵一到彼當瓦解土兵未到機事先洩或調遣過期猛非束手就擒者一旦竊發必有儂智高劫州縣之擾驚動嶺表之憂賊兇談轉增變起旦夕臣不一言非忠也故臣復以猛之決不可宥爲 陛下 言之會永保兵至自督師分兵五哨威之破定羅下丹梁猛子邦彥與其驍將韋好陸綬列十二營於工堯分道挑戰官軍奮而前斬綬好邦彥被箭遁去其衆

始大潰猛出三家灘自陣於平馬聞之不戰亦潰於是諸軍集於田州猛欲奔歸順諸軍從之歸順土官岑璋者猛之岳父也始亦欲庇猛俄而官軍四集乃鳩猛傳首南寧而其子邦彥亦病死齊村射猛之麾下凡十八人擒斬幾盡捷奏上嘉其功進左都御史加太子少保蔭子爲錦衣衛百戶且有白金文綺之賜降勅獎勵潮惠二郡流賊江文賴貴并賀縣蠻莫和平曾蛇仔會歸雷骨干等肆暴作亂遣僉事施君儒討平之亦有白金之賜初鵝湖費公以崔昂之故擄鎮於外既入廣年資後者率進尚書而鎮兵革方殷選朝無日矣沈希儀者健將也坐累被繫鎮曰用仁去貪用智去詐用勇去暴十城之材豈宜輕

棄奏復其官至是功冠諸將其用云永保二兵先以張盛
二公調發中止鎮往調之遂是不至比至值盛夏既乘勝深入
瘴癘方作軍中大疫亡者衆不能留遂班師而返獨土目盧蘇
未獲而王受梁帝者則劉召之遺黨也方召被誅盛應期必欲
盡殲其黨而逃按謝汝儀者輒封刀止殺受等逃匿未獲至是
盧蘇招受等同叛叅將張經奏議汪必東僉事申惠聞變不戮
力抗禦委城而遁蘇遂入田州執我署印知州王熊兆而受襲
據思恩然二酋數求救察佐多勸從之鎮曰不可交南之役平
而復叛者四麓川之役平而復叛者三二酋假息游魂不誅之
無以懲後奈何曲庇其罪以偷旦夕之安乎乃引咎復奏於

朝請軍勦之廣西布政嚴紘失謁鑊責其使紘銜之喉巡按石金
劾其失策以致再亂且言岑猛父子尚在交趾助之將破兩廣
郡縣以逞其忿又使人喧傳四方人多信之時桂萼張璉每於
館閣出金紘揭帖於袖以示諸講官謂兩廣難保大學士楊一
清折之曰任事難議事易宜徐察之二公不聽廣東提學魏校
以毀淫祠爲名毀諸名刹其田數千畝盡入方西樵霍渭厓諸
一家鑊至廣命追奪還官方霍恨甚至是遂與張桂合議排之六
年六月以災異例請致仕上輒允之且曰姚鑊不去則王守
仁不來蓋已有先入之說矣一清歎曰凡公卿有才望者輒以
計去之豈非空人之國乎張桂每言大同當征而反撫田州當

撫而反征乃費宏謀國不臧以成南北之患其意實主於排宏故不得不抑鎮以伸其說鎮既得請所調諸軍已集永保之軍請戰乃造浮橋濟師而石金毀橋以小舟渡鎮令給其軍餉而石金則抑而不與初永保之兵聞有言岑猛在者瞋目怒曰岑猛我所擒也今謂尚在當生擒三酋以獻於朝以詰猛所在金聞之益懼以故多方阻撓以候王陽明之至及明陽至主撫二酋謂猛罪止於讐殺歸咎於鎮之征猛罪大惡極恐軍門討之恒大言曰兩廣何難圖之有每省以兵三千取之足矣又曰誰敢犯我我以兵一萬塞梅嶺天下救兵從何處來又曰兩廣七人地也朝廷但有借用之耳出語既大不遜而吞噬隣封

了無已極使猛未死誰敢以百口保之及猛死乃有謂夷狄樹
攻中國之利又有謂猛止於讐殺非所當征者惟主於求勝以
害鎮而不知其言之爲非然嶺南公論終自在也鎮亦抗章論
巡按侵軍門之權且備陳一時利害而石金謂撫有十利征有
十害之說於是皆以罪鎮遂令閑任後起總督三邊詳陝西三
邊總督

王守仁字伯安浙江紹興府餘姚縣人弘治己未進士歷南京
兵部尚書封新建伯嘉靖六年廣西思恩府田州府知府土官
岑猛之亂提督都御史姚鎮不能成功兵部侍郎張孚敬禮部
侍郎桂萼同薦守仁堪任此事 朝廷俞允於本年六月初六

日兵部奉 欽依差官持檄授總制軍務督同都御史姚鏌勘
處彼中事情守仁上疏辭免請舉尚書胡世寧李承勳自代

朝廷不允 上與閣老楊一清曰姚鏌不去王守仁決不肯來遂

令姚鏌致仕又降 旨督趨赴任 旨云卿識敏才高忠誠體

國目今兩廣多事方藉卿威望撫定地方用舒朕南顧之懷姚
鏌已致仕了卿宜星夜前去節制諸事調度軍馬撫勦賊寇安
戢兵民勿再遲疑推諉以負朕望還差官馬上齎文前去敦取
赴任行事時黃綰爲光祿寺少卿具疏論江西軍功及薦其才
德堪任輔弼 上喜親書御劄以疏付內閣議楊一清忌入閣
與之同列乃與張孚敬議具揭帖對曰王守仁才固可用但好

服古衣冠喜談新學人以此怪異潛進揭帖毀之 上意遂止

王守仁遂以九月初八日扶病起程至十一月二十日抵梧州
蒞任代其總制四省軍務事守仁沿途訪諸士夫詢諸行旅皆
云岑猛父子固有可誅之罪然所以爲亂者皆當事諸人不能
推誠撫安以致之上疏謝恩極言致亂之由平復之策十一月
楊一清與吏部尚書桂萼謀恐事完當回京復 命 上必留

用故題命兼理巡撫題奉 聖旨王守仁暫令巡撫兩廣等處
地方寫 勅與他咨到又力疏辭免舉致仕都御史伍文定刑
部左侍郎梁材自代不允遂兼巡撫之職進至平南地方與都
御史姚鏌交代建議大約以爲進兵行剿之患十罷兵行撫之

善十與夫二幸四毀之弊時布政使林富紀功御史石金皆以爲然遂至南寧府乃下令盡撤調集防守之兵數日之內解散而歸者數萬有餘湖兵數千道阻且遠不易卽歸仍使分留南寧賓州解州休養待閒而發初思田二州民盧蘇王受等聞守仁來知無必殺之心皆有投生之念日夜懸望惟恐其至之不逮及旣至又見防守之兵盡撤其投生之念益堅乃遣其頭目黃富等十餘人於明年正月初七日先赴軍門訴告願得掃境投生守仁諭以朝廷威信又開示更生之路蘇受等旣得諭羅拜歡呼隨撤守備盡散其衆掃境來歸二十六日俱至南寧府城下分屯爲四營明日蘇受等皆囚首自縛各與其頭目

數百人赴軍門投見號哀控訴且言蘇受等久欲挺身投訴見得四方軍馬阻截兼聞陰使蘇圖殺王受又使王受圖殺蘇反覆難信以此連年抱苦控訴無由守仁復諭以朝廷恩德既赦爾等之死寧肯誘爾至此於是下盧蘇王受於軍門各杖一百衆皆合辭叩首爲之請命乃解其縛諭以今日宥爾一死者是朝廷好生之仁杖爾一百者乃我等人臣執法之義於是衆皆叩首悅服隨至其營撫定餘衆莫不感泣歡呼感恩誓以死報乞殺賊立功以贖前罪守仁復諭以朝廷惟願生全爾等今爾方來投生豈忍又驅之兵刃之下爾等逃竄日久家業破蕩且宜速歸完爾室家及時耕種修復生理至於各處盜賊

軍門自有區處不須爾等勦除待爾等家事稍定徐當調發於是又皆感泣歡呼遂委布政林富總兵官張祐分投安插督令各歸復業既而上疏處置平復地方以圖久安仍置立土官以順其情分土目以散其黨設流官以制其勢猶以土夷之心未必盡得而窮山僻壤或有隱情則又備歷田州思恩之境按行其村落而經理其城堡因究所以處之之道詢諸其長月率皆以爲善又以詢諸其父老子弟又皆以爲善然後信其可久行而反覆其辭更互其說以請田州仍立岑氏後爲土官知州以順土夷之情特設流官知府以制土官之勢分設土官巡檢以散各夷之黨又以田州既設流官宜更其府名爲田寧蓋取用

石傾田州兵田石平田州寧之謠至於思恩則岑濬之後已絕不必復有土官之設矣又按視斷藤峽諸處搖賊上連八寨下通仙臺花相諸洞連絡數十餘巢盤亘三百餘里彼此犄角結聚憑險流劫郡縣鄉村被害軍民屢奏請兵征剿國初以來屢征不服乃檄叅將張經會同守巡各官集議停當於是命潯州衛指揮馬文瑞等承順統兵宣慰彭明輔官男彭宗舜保靖統兵宣慰彭九霄及辰州等衛指揮彭飛等各分兵布哨以承順土兵進勦牛腹等賊巢保靖土兵進勦六寺城等賊巢以四月初三日取齊抵巢先是賊酋訶知駐劄南寧寂無征剿消息又不見調兵集糧遂皆怠弛不以爲意至是突遇官兵四面攻

圍各賊倉惶失措擒斬賊酋及黨與頗多餘賊退敗復據仙女
大山憑險結寨我兵追圍拔木緣崖仰攻復大破賊寨乘勝復
攻破油碓石壁大陂等巢餘賊奔至斷藤峽橫石江邊因追兵
緊急爭渡覆溺死者無算并斬獲首從賊徒首級俘獲男婦牛
畜器械等項不可勝數乃令收兵潯州府駐劄復命各官兵移
兵進剿仙臺諸賊巢諸軍吏各率永順保靖土兵爭先陷陣賊
又大敗奔入永安邊界地名立山恃險結寨乃摘指揮王良輔
并目兵彭愷等於二十四日分路並進四面仰攻賊乃敗散隨
命布政林富副總兵張祐分拔密切調目兵盧蘇王受等分定
哨道進剿八寨前後生擒斬獲并俘獲男婦頭畜器械殆盡守

仁以八寨之地據其要害欲移設衛所以控制諸蠻復於三里設縣迭相引帶親臨相視思恩府寨景定衛縣規則蓋南丹衛舊僻在廣西極邊之地非中土之人所可居者於是移築於周堡正當八寨之中以阻扼其道路之衝則柳慶諸賊不必征勦皆將効順服化思恩舊治原在寨城山內尚歷高山數十餘里今移出橋利六十里外地名荒田四野寬衍之處開圖立里用漢法以治武緣之衆夷夏交和公私兩便復移鳳化縣治於虞鄉爲立解宇屬之思恩又於宣化思龍地方添設流官縣治是皆保治安民至要也又增築守鎮城堡於五屯以壯威設險仍選取協守諸兵及附近土寨目兵擇委智略忠勇官一員重任

而專責之使之訓練撫摩務在地險既設而士心輯和又令叅將兵備等官不時親至其地經理而振作之則賊勢自摧又將思田分設九土巡檢司各立土目衆所信服者管之節次具疏奏請定奪奉 旨王守仁受命提督軍務蒞任未久乃能開誠宣恩處置得宜致令叛夷畏服率衆歸降罷兵息民奇功可嘉寫 勅差行人齎去獎勵還賞銀五十兩紵絲四表裏布政司買辦羊酒送用九月初八日行人馮恩齎捧 勅書并銀幣行至廣城是時守仁臥病床褥已餘一月扶病具疏謝 恩而病勢日篤猶力億視事先是守仁十五歲時夢中嘗得句云卷甲歸來馬伏波早年兵法鬚毛蟠莫知其謂至是舟至烏蠻離舟

人指曰此伏波廟前灘也守仁呀然登廟禮拜如夢中所見因讀夢中詩且歎人生行止之不偶云乃於十月初十日復上疏乞骸骨就醫養病因薦林富自代病革又一月乃班師行至大庾嶺謂布政使王大用曰爾知孔明之所以付托姜維乎大用遂領兵防守爲敦匠事於舟中命家童陳欽具本月二十九日未時行至南康縣將屬纊之際家童在傍問何所囑守仁曰我他無所念平生學問方纔見得數分猶未能與吾黨共成之爲可恨耳遂屬纊而逝昇至南安府公館而欽柩經南贛雖深山窮谷男女老弱皆縞素出迎道左匍匐哀號若喪考妣凡所過江西地方行道之人無不流涕撫棺慟哭而去江西御史儲良

林奏計至吏部尚書桂萼欲因乞回籍就醫養病疏叅駁害之
令該司匿其計不舉乃叅其擅離職役及叅其處置廣西思田
八寨事威恩倒置又詆其擒宸濠軍功冒濫乞命都官會議
遂削世襲伯爵餘詳南京兵部

林富字

福建興化府莆田縣人弘治壬戌進士授大理寺

評事歷寺副寺正寧波府知府嘉靖二年陞廣東右布政使六
年陞都察院右副都御史撫治鄖陽未任七年改提督兩廣軍
務兼巡撫八年加兵部右侍郎兼都察院右僉都御史仍前職
任十一年致仕

陶諧字世和浙江紹興府會稽縣人弘治丙辰進士選庶吉士

授工科給事中陞江西僉事歷河南左布政使嘉靖十年歷
副都御史提督南贛軍務兼理巡撫蒞任條陳數事曰重守令
專分守寬農民懲貪酷行之十一年以兵部右侍郎兼僉都御
史任至則盡心經度隨宜勦撫若西山瓊州古田南平七山暨
海賊凡七大捷斬獲數萬招降二十餘萬添設建白縣以絕後
患又立嶺表書院簡子弟親訓之作其良心十三年丁憂後起
兵部左侍郎詳兵部

錢如京字

直隸安慶府桐城縣人弘治壬戌進士任山西

左布政使嘉靖七年陞南京太僕寺卿奉年陞巡撫保定右副
都御史九年陞工部右侍郎十一年陞兵部左侍郎十四年以

兵部左侍郎兼僉都御史任十五年陞南京戶部尚書十九年
歷刑部尚書詳刑部

潘旦字

直隸徽州府婺源縣人弘治乙丑進士授戶部雲

南司主事正德六年陞廣東司員外郎九年陞漳州府知府十
年丁憂十三年補撫州府知府未任丁憂十五年補邵武府知
府嘉靖二年陞浙江副使六年陞江西按察使七年陞浙江右
布政使八年陞都察院右副都御史撫治鄖陽十年陞南京大
理寺卿十一年陞南京吏部右侍郎十四年改刑部右侍郎十
五年陞兵部左侍郎兼左僉都御史提督兩廣軍務兼理巡撫
十六年取回南京兵部尋令致仕

蔡經字

福建福州府侯官縣人正德丁丑進士授嘉興縣

知縣嘉靖四年擢吏科給事中六年陞禮科右給事中七年陞
吏科左給事中本年陞戶科都給事中十一年陞太僕寺少卿
本年陞大理寺右少卿十四年陞都察院右僉都御史巡撫山
東地方十五年補都察院左僉都御史理院事十六年陞都察
院右副都御史理院事本年陞兵部右侍郎兼左僉都御史提
督兩廣軍務兼巡撫二十年以安南功加右都御史二十一年
以軍功加兵部尚書兼前職二十三年丁憂二十五年起總制
三邊被劾未任後三十年起戶部總督倉儲尚書丁憂三十二
年起南京戶部尚書改南京兵部二十三年改兵部尚書總督

浙直軍務逮獄

潘鑑字希古直隸徽州府婺源縣人正德戊辰進士五年除南京大理寺右評事八年陞本寺右寺副十五年陞本寺右寺正本年陞福建僉事十六年丁憂嘉靖二年補四川未任調浙江僉事三年陞貴州副使五年回籍八年補河南副使本年陞四川按察使未任改山西按察使十年陞江西右布政使十二年陞四川左布政使十三年陞都察院右副都御史巡撫四川地方十五年陞工部右侍郎兼右僉都御史督徽川廣江浙湖大木十八年陞工部左侍郎回部管事未任養病二十年起原任兼左副都御史督川廣大木二十一年以採木勤勞陞都察院

右都御史仍督大木二十二年命專督四川大木二十三年陞工部尚書回籍尋改兵部尚書兼右都御史提督兩廣軍務兼理巡撫懇辭致仕本年卒於家贈太子太保謚襄敏

張岳字維喬福建泉州府惠安縣人正德丁丑進士嘉靖十年任廣西提學僉事十一年改江西提學十二年謫廣東提舉十八年任浙江提學副使二十一年任撫鄖陽右僉都御史二十二年遷撫江西二十三年以兵部左侍郎兼左僉都御史二十六年遷兵部左侍郎未任二十七年陞總督湖廣川貴軍務右都御史詳湖廣川貴總督

歐陽必進字任夫江西吉安府安福縣人正德丁丑進士

嘉靖

二十四年以右副都御史巡撫應天二十六年改督漕運未任
本年改總督兩廣尋加兵部右侍郎二十九年陞南院右都御
史歷工部尚書都察院左都御史吏部尚書加少保廉太子太
保詳吏部

周延字南喬江西吉安府吉水縣人嘉靖癸未進士

二十六年

以右副都御史巡撫應天二十九年以兵部右侍郎兼僉都御
史任三十年陞刑部左侍郎累官南京吏兵尚書改都察院左
都御史加太子少保詳都察院

應櫝字子材浙江處州府遂昌縣人嘉靖丙戌進士二十二年
任湖廣提學副使三十一年以兵部右侍郎兼僉都御史任三
十三年卒於官

